

# Pola Korinnandmo iñmbaia mac tiratna timbiñ rapar **Outna kam**

Korin auñ aniacna Iesusna ritipaikta meikramtairta tumbunna ndeida Polmo kam ñgoreac ndopri, anna ndo Polmo moa kadmairina. Aintik ma gan timbiñ rapara minmo tirrina, na ma minapmo kamb wandonjaina, te, ma minmo mac tongonande.

Na gan timbiñ raparna inikna outna kamb tipembca, Pola ñgaua ma Korinnandapmo, mbopatna kamb gargara ma minmo an mac mbopatna. Na ma an kamb ndopna karirina, anna gaind, mina garuruca mina manmo kamb ñgorikca mboprinan tik. Ainda moca ma minmo kam gargar ndoprina. Ri, mina mana kamb mbaraca ndorita tipemb kirarirmo ñgetrikirina. Aintik mandeaca ma tonþoñ ñgoin.

Na an minna Iudiana pitriik wañna Iesusa ripacrena laiplacara laña mba eaci. Aintik Pola min ñgotacna moca kitcairtukar iua aنجica taŋga minmo neaŋna. Ainda moca gan timbiñ raparna inikna sapta 8na minna tîkca taŋca sapta 9na min, na Pola ma Korinnanta iroar inkara moi ñgepna kamb ndoprina, te, mina an aiŋna moca kitukndukara neaŋna.

Na gan timbiñ raparna mamamaia, Pola an paparuna up aŋgirena ramtair ndeida kipca Korin auñ aniacca eaca, mina Polna imo mo

irikrinan, na mana up aŋgirena ramtairta aiŋmo pepererenan.

## Up aŋgirena ramtairta aiŋna kam

*(1—7)*

<sup>1</sup> Aku Pol, aku Karais Jesusna up aŋgirena ramoot. Na Raraŋ Aetaniac, ma ndona tonṭonj ḥgoin mbuŋa, ma aukmo up aŋgirena ramootta larapacrina. Na aukapa, aukna lap Timotiap, aŋga gan timbiŋ rapara tiratnanna, nenmo Korin ndeacrena Raraŋ Aetaniacna Jesusna ritiipaikta meikramtairta tumbunapa, an Akaiana pitrik inik ndeacrena Raraŋ Aetaniacna meikramtairap, nenmo muruŋcamiŋa neaŋga makipek. <sup>2</sup> Na aina Aet, Raraŋ Aetaniacapa Kacoot Jesus Karaisa nenmo kadmaica nena iroar inkarmo moi wewettaca laŋ ndeacnandet.

*Pola Raraŋ Aetaniaca manmo otacatna moca  
ma manmo kam laŋ neajrina*

<sup>3</sup> Na aia Raraŋ Aetaniacna imo aŋgi ḥgepraj, ma aina Kacoot Jesus Karaissa Aet, na ma Raraŋ Aetaniac, na ma aina Aet Raraŋ Aetaniac, na ma kakadmaina iro wetwetna tip kirarna mīniŋapa ma kadmairena. Na Raraŋ Aetaniacna meikramtaira makukarap eacrenanmo, ma moa iro inik wewettarena. <sup>4</sup> Na an makukar wit anikca aimo larurenanna, Raraŋ Aetaniaca aina iroar inkarmo, ma moa wewetta irikrena. Aintik aia mīn, aia an meikramtaira titocna makukarap eacrenanna, aia moi iriknande, na an tipna

kirara Raraŋ Aetaniaca aina iroar inkara moa wewettarena. <sup>5</sup> Na makukar anikca Karaisa mbukrinan, ai toco mbukrena. Na aintocna kirara Karaisna nikinik iro wetwet aniacia aiap eacrena. <sup>6</sup> Na aia makukar angi te, anna ndo nena iroar inkara moi wewettaca, an mbuŋa Raraŋ Aetaniaca nenmo ainda moi mac nda anginande. Na Raraŋ Aetaniac, ma aina iroar inkara moi wewettanande, te, anna nena iroar inkar motocmo moi wewettanande. Na ne matau witikca gagaraca ai angirena girgirna kirar angi te, Raraŋ Aetaniaca ma nena iroar inkarmo moi wewettanande. <sup>7</sup> Na aia gaind ŋgoinna ripaca agraca lamnjirena, ne witikca agrarena. Na aia lamnjirena, ne aiap an girgir anginandet. Aintik ne toco aiap an nikinik iro wetwet anginandet.

<sup>8</sup> Ainda moca ne Iesusa ripacrena laiplacar, aia tongorinanna ne matau lamnjirena, an makuk aniacia aimo Esiana pitrik aniacia tikca laruatnanmo. Na an makuk bagaraniaca aimo moa ŋgocraiatna, na aia aind ndamnjatna aia menacnande. <sup>9</sup> Na anna gidik ŋgoin, aia an ritri waparacna ramootta ramootmo mo menacna ndoprena kamna kirara aia waracri, na aintocna makukna kirar aia angorinan. Na aia ndorita ritipaikmo, ndori puŋga kai moi gagara teac. Wanaiŋ. Aia Raraŋ Aetaniac ningikca ripac, an Raraŋ Aetaniac, mandaia ndo an menacrena meikramtairmo mac moa ŋgeprena. <sup>10</sup> Na an reac ŋgoreac aniacia maica aimo moa menaca kattatna. Na Raraŋ Aetaniac, ma aimo mac

**1:5** Nap 34.19, na 94.19, na Kol 1.24    **1:7** Ro 8.17, na 2 Ti 2.12

**1:8** Up 19.23, na 1 Ko 15.32    **1:10** 2 Ti 4.18, na 2 Pi 2.9

nda anjiatna. Na ijmbai toco ma aimo mac nda anginandet. Ainda moça aia mana eteac lajna lambirena, na reac ḥgoreaca aimo moi ḥgocraina kip te, ma aimo mac nda anjica aia laj ndeacnande. <sup>11</sup> Ne aimo mbembendei mbuŋ ḥgotac. Te, Raraŋ Aetaniac, ma meikramtair witna mbembendei mbaraca ma aimo otacna. Te, meikramtair wit aniacna watca, mina Raraŋ Aetaniacmo kam laj neajna, na an reik ma ai ḥgotacna morinan.

### *Pol ma Korinnandmo mba paruri*

<sup>12</sup> Ainda moça aku an reac kabena tonṭon bagaraniac ḥgojinna morena, na ndona iro inik mbuŋaku gainda lamnjirena, aku tip kirar wandoŋapa tip kirar gidikca morena, anmo Raraŋ Aetaniaca meikramtairmo, neajngatna tipna kirar mbuŋ. Na Raraŋ Aetaniaca ma aukna nakadmaica ma aukmo ainta tipna kirar neajngatna, na aku an landamjina kirara aina gan tiacarpaikna ramoot ian ndambuŋ mba tikca anjiri. Na aku an tipna kirar mbuŋ meikramtair wit aniacna inikca taŋrena, na nena rikca aku an tipna kirar mbuŋ taŋrena. <sup>13-14</sup> Na an minna aku timbiŋ raprira tirca nenmo neajga kiprenan, aku ton̄orenanna, aku turrina timbiŋ rapara ne watca ne anna miniŋa mataua watta rapacrina, na an ningik. Na aku nenmo kabena kam kirar ianna mba tiratke. Gade gan ningik, na aku tirrena kamb wit aniacna ndeidmo, ne memetmbaca kidrikar

ndeida ḥajari wati rapac garac ḥogocor. Na aku tonjorenanna, ne aukna tirrina kambta mīniŋ koinda matau wat garac, an aina Kacoot Iesusna ritri waparacna ra aniaca an laruekna mīn mbuŋa, ne aukmo tonjona weperai aniaca monandet, na auk toco nenmo tonjoca, weperai aniaca monandet.

**15-16** Na aku gainda ripaca lamnjirina, an tipna kirara aku morenanmo, ne tongonandet, na anna mīniŋna mocaaku ndona iroa moatna, aku kipca nenmo pac watcarica, ijmbaia aku nen tikcarica, Masedonia taŋnande, na kaina oitna minnaaku Masedonia tīkcari te, aku lamnjirina, aku nen ndambuŋ mac nda kipnandet. Na an tipna kirar mbuŋa Raraŋ Aetaniac, ma nenmo kīdrik mbuniŋa matau raupninand. Na ne aukmo otacaaku pitrik waŋ aniac Iudia taŋna.

**17** Na titoca moca? Na ne gaind ndamnjirena, an kambcaaku nenmo parua mbopre ki, a? Na ne gaind ki ndamnjirena,aku nemo bababu kamainda morena ramootna kambmo, morena kirara kambmo tamtamma ḥegetrikica aindoprena, “Anna gidik.” Na ijmbaia aindopnande, “Anna parurena.” Wanaiŋ ḥogoin. **18** Na Raraŋ Aetaniac, ma ndona kamb koinda ranjairena, na aind niŋgikcaaku nenmo kam gidik ḥogoin ndoprena, na kamb wit aniacaku nenmo mboprenan, “Gidik,” na, “Wanaiŋa,” anna eac ḥogocor. **19** Na aukapa, Sailasapa, Timotiap, aia nena rīkca tīkca kamb wiwitia mboprenan, anna Raraŋ Aetaniacna Nuoc, Iesus Karaisna

kamb. Na ne lamŋirena, Karais ma, “Gidik,” na, “Wanaiŋna,” kambca ma mba mboprenanna, wanainj. Karais ma gidik ningik ndoprena. <sup>20</sup> Na Raraŋ Aetaniac, ma bababuar witta moa eacrena, ainda moa Karais ma, “Gidik ningikca,” an bababuarmo mboprena. Aintik aia Raraŋ Aetaniacna kamma warac, na Karaisna i ningik mbuŋa aia gaindoprena, “Anna gidik,” aia an kam ningik ndopca Raraŋ Aetaniacna i aniac aŋgira, ŋgeprena. <sup>21</sup> Na Raraŋ Aetaniac, ma ndo aiapa nenapmo larapaca moa gagrareke, na aia Karaisap mikca eacrena, na ma ai motocmo aij neaŋga eacrena. <sup>22</sup> Na ma ndona ŋganŋanŋimo, ai mbuŋa tıkca eacrena, na ma Neron Ratmo aina iroar inkara tıkca eacrena. Na Raraŋ Aetaniaca aimo neaŋ ndoprina reikta reac ian, ma aimo outta neaŋgatna, na anna Neron Rat, na aia aind ndamŋinande, gidik, gidik ŋgoin, ma aimo an reikmo muruŋa iŋmbaia neaŋnande.

### *Pola Korinmo mba mac tawi taŋgatke*

<sup>23</sup> Na Raraŋ Aetaniacna i mbuŋa, ma aukna kambmo gidik ndoprena. Aintik aku kam gidik ningik ndopraŋnande. Na aku nenmo makukar neneaŋa, anna laŋa wanainj. Ainda moa aku Korinmo tawi taŋ ŋgocor. An ningik. <sup>24</sup> Na aku gainda mba mbopatke, aia nena ritiipaikca raupŋirena, wanainj. Nena ritipac mbuŋ, ne

---

**1:20** Ro 15.8-9, na KIEK 3.14    **1:21** 1 Io 2.20, na 2.27    **1:22**  
Ro 8.16-17, na 2 Ko 5.5, na Epe 1.13-14, na 2 Ti 2.19, na 1 Io 2.27,  
na KIEK 2.17    **1:23** Ro 1.9, na 2 Ko 11.31    **1:24** 1 Pi 5.3

witikca pañpajirina. Ainda moca aia muruña nenap aiña mo te, anna nemmo mo tongonande.

## 2

<sup>1</sup> Ainda moca aukna iro inik ŋgoinna aku gaind ndamnjirina. Aku nen ndambuña mba mac nda kipitndai, ɻarikca nenmo makuk mac neaŋ nari. <sup>2</sup> Na aku nenmo makukar neaŋ te, na mandaia ndo aukna nikinik iromo moca aku tongoit? ɻarikca aku nenmo moi makukca neaŋna te, na titocna ramootta ndo aukna nikinik iromo moca aku tongoit? <sup>3</sup> Na ne aukca moi tonjona meikramtair, aintik ɻarikca aku nen ndambuŋ nakipca makuk anŋi narica. Anna moca aku timbiŋ rapara ŋgaua tirca neaŋga kipatna. Na aku reac ianna tongo te, ne toco muruña an reaca tongonandet. <sup>4</sup> Na anna gidik, ŋgaua aku nenmo timbiŋ rapara tiratnan, an minna aku nikinik iro g̊irg̊ir bagaraniac anŋica, na aku gidikca nananae aniac ŋgoinna moatna. Na aku an timbiŋ rapara tirca neaŋgatna, na nenmo nikinik iroara makukara mba neaŋgatke. Wanaiŋ. Aku nenmo tiratna timbiŋ rapara, nenmo gaind ndamnjina, aku nemo matŋirenan ŋgoin.

### *Korinnanta tip ŋgoreacna makukna kam*

<sup>5</sup> Na ramoot ianna ma kabena meikramtairmo, makuk neaŋ te, ma aukmo makukca mba neaŋri. Wanaiŋ. Na aku an reac nake kam wit gargara mba mbopitndai, na ma nena wiŋmo kakadmaica neaŋrinan. <sup>6</sup> Na an opoik ŋgoreaca an

ramootta aŋgirinanna, meikramtair wit aniac aŋgirinanna, anna ndoprenanna, anna manmo min. <sup>7</sup> Ainda moca ne mandeaca kabena tip kirarmo an ramootmo mo. Aintik ne mana tipemb ŋgorikta makukarmo mo kecarica, mana nikinik iroa moca wewettana. Moca an nikinik irona makuk aniac aŋgirinanna, ne manmo wandac, na ne manmo matŋirajna. <sup>8</sup> Na ŋgaua aku an timbiŋ rapara tiratnan, anna nenmo towaiatna. Na aku garacna moca, ne aukna kamma raŋgaica reac, reaca more ki, co wanain? <sup>10</sup> Na ne ramoot ianna tip ŋgoreacna makukca mo kecari te, auk toco mo kecarinande. Na aku tip ŋgoreacna makuk ianmo kocnai mo kecarina ndop te, anna aku Karaisna lamniac mbunja tika kocnaia nena makukarmo mo kecaria, nenmo otacna. <sup>11</sup> Na aku ainda morenan, anna aku rugut morina, moca Ramoot Mbikca aimo paru te, aimo wiŋa aia reik ŋgorikca monandet. Na mana tipemb kirarimo aia lamŋirena.

### *Pol ma Taitusa watna toŋtoŋap*

<sup>12</sup> Na an oitna minna aku Toroas auŋ aniacmo Karaisna kam wemban laŋ manan wiwitina moca, Kacootta aukna taup ianna moatna, an aiŋa mona moca. <sup>13</sup> Na aku ndona lap Tatusmo wat ŋgocor. Aintik aukna iro inikca laŋa eac ŋgocor. Ainda moca aku Toroas auŋ aniac tika carica aku Masedoniana pitrik waŋ aniac mataŋgat.

*Raraŋ Aetaniacna gargar mbuŋa aia ruŋga  
gagraca witikrena*

<sup>14</sup> Na mandeaca aku Raraŋ Aetaniacmo kam lanj neaŋnande, memetmbaca ma aimo otaca, aia Karaisna gargar mbuŋa witikca ruŋga gagrarena, na puŋnanjepmo mo irikrenan. Na aina aiŋ mbuŋa Raraŋ Aetaniacmo moa waek-eri, meikramtaira Karaismo lamŋirena. Na an landamŋia, anna iŋpai tararna kirara mon tam-tamma taŋrena. <sup>15</sup> Na anna gidik, aia ndoria an iŋpai tararna kirara Karaisa mac nda aŋgina morena meikramtair tambuŋapa, an ŋgocraina morena meikramtair motoco taŋrena. <sup>16</sup> Na an ŋgocrairena meikramtair, mina memenacna iŋpai tararap eacrena. Na anna minmo memenaca moa larurena. Na Iesusa mac nda aŋgina meikramtair, mina iŋpai tarar ŋgoinap eacrena, na anna minmo eteac laŋna watta moa larurena. Na mandaia ndo mĩn, ma an aiŋa moit? <sup>17</sup> Na ne lamŋirena, aia meikramtair witna kirara wanaiŋ, mina tamtamma taŋca Raraŋ Aetaniacna kammo an mbuŋa kituknduk aŋgina aiŋa morenan. Wanaiŋ. Aia Raraŋ Aetaniacna aiŋ aŋgica anmo tamtamma mba morenanna, wanaiŋ, aia manmo wandoŋ ŋgoinna morena. Na aia Karaisap iro kabe niŋgik ndeacrena, na aia Raraŋ Aetaniacna lamniac ŋgout mbuŋa aiŋa

---

**2:15** 1 Ko 1.18, na 2 Ko 4.3    **2:16** Lk 2.34, na In 9.39, na 1 Ko 15.10, na 2 Ko 3.5-6, na 1 Pi 2.7-8    **2:17** 2 Ko 1.12, na 4.2, na 11.13, na 1 Pi 4.11, na 2 Pi 2.3

morena.

### 3

*Aia kam ɳgam leacrina aiŋna ramtaɪr taru-atna*

<sup>1</sup> Na ɳarica aia an kamb toprenanna, aia nenmo mac wai aoc te, na ne gaind ndamŋinande aia ramtaɪr wandoik ki? Co, aia kabena meikramtaɪrtä kirar, na kabena meikramtaɪrmo digica mina timbiŋ rapara tirca aindopna aia ramtaɪr laiŋ ki? Co, aia nenmo, ai ɳgotacna timbiŋ rapara tirna digirenan ki? Wanaiŋ ɳgoin. <sup>2</sup> Na aina i aŋgiri ɳgepna timbiŋ rapara, anna nen ɳgoin, na mana nininia aina nikemb inkar maeacreke. Na meikramtaɪr wit aniac, mina an timbiŋ rapara watrena, na mina lamŋirena. <sup>3</sup> Na ne waakeke ɳgoin ndeacrena, Karais neaŋga kiprīna timbiŋ raparna kirar. Na aina aiŋ mbuŋa Karaisa tirrīna. Na ma laup mbuŋa mba tirri. Wanaiŋ. Ma Raraŋ Aetaniacna iarwar ndeacrena Neroŋ Rat mbuŋa tirrīna. Na ma waut nambatta mba tiratke, wanaiŋ, ma meikramtaɪrtä nikinik iro mbuŋa tirrinan.

<sup>4</sup> Na anna mīniŋa gaind, Karais mbuŋ ma aina rītipaca moa laruca, aia Raraŋ Aetaniacna ripaca, aia aindopatna, <sup>5</sup> gidik, aia ndori puŋga an aiŋa mona mīnna wanaiŋ. Aintik aia ndori puŋga ainda mba mbopitndai, aia reac ianna mona mīn. Wanaiŋ. Na Raraŋ Aetaniac ma ndo

---

**3:1** Up 18.27, na Ro 16.1, na 2 Ko 5.12    **3:2** 1 Ko 9.2    **3:3** NA 24.12, na Ier 31.33, na Esi 11.19, na 36.26, na 1 Ko 3.5, na Ib 8.10    **3:4** 2 Ko 2.16    **3:5** In 15.5, na 1 Ko 15.10, na Pil 2.13

niŋgikca aimo moca aia an aiŋa mona miŋ. <sup>6</sup> Na ma ndo aimo moa minna tıkca, aia an leacatna kam ŋgamna aiŋa mona ramtair ndeacrena. Na an leacatna kam ŋgamma anna mina Tip Wandikna timbigta kapna inikca mba tirrinan, wanaiŋ. Anna Neronj Ratna reac. Na Tip Wandikna kambca ma meikramtaira moa menacrenan, na Neronj Ratnanna ma meikramtairmo eteacna watta neaŋrenan.

<sup>7</sup> Na ne lamjirena, an aiŋa Raraŋ Aetaniaca moca, Tip Wandikmo neaŋrinan, anna meikramtairmo memenaca moa larurena. Na Raraŋ Aetaniac, ma kambmo an Tip Wandikca waut mbuŋa tirca meikramtairmo neaŋrinan, na anna mana memetaca moa larurina, na ma meikramtairmo memetaca neaŋrinan. Aintik Mosesna inpaŋanna Raraŋ Aetaniacna memetacap metacamacariat, ainda moca Israelnanda mana inpaŋanna watna minna wanaiŋ. Na iŋmbai mbuŋa an memetaca mamaiat. <sup>8</sup> Ainda moca Raraŋ Aetaniac, ma meikramtairmo Neronj Rat neaŋna morina aiŋa, anna an aiŋmo kunda Tip Wandikmo tamuŋmbai, te Raraŋ Aetaniacna gargarapa memetacna tac aniac a an aiŋmo eacraŋnande. <sup>9</sup> Na Tip Wandikna aiŋ ma aimo ritri waparaca tıkca aimo aindoprina aia kocnai topnandet, na Raraŋ Aetaniacna memetacna tac aniac Tip Wandikap toco eacrena. Aintik an kam wiwitina an aiŋa momo aia gaind ŋgacrena, meacramoota moi wandonjai, an

---

**3:6** Ier 31.31, na In 6.63, na Ro 7.6, na 1 Ko 11.25, na Gal 3.10, na Epe 3.7, na Kol 1.25, na Ib 8.6-8    **3:7** NA 34.1, na 34.28-30, na TW 10.1, na Ro 7.10    **3:8** Gal 3.2, na 3.5    **3:9** TW 27.26, na Ro 1.17, na 3.21

aiŋa Raraŋ Aetaniacna memetacna tac aniacna minna tıkca eacrenan. <sup>10</sup> Na an aiŋa atua ma memetacna tac aniacna aŋgirina, na mandeaca ma an memetacna tac aniacap eac ḥgocorta kirar. Na anna gidik, kabena aiŋa manmo kunda memetacna tac bagaraniac ḥgoin. <sup>11</sup> Na an aiŋ bagara ma memetmbaca mba mac eacitndai. Wanaiŋ. Ma mainande. Na ma kipatnan, ma Raraŋ Aetaniacna memetacna tac aniacap kipatna. Aintik aia lamŋi, an memetmbac ndeacna aiŋ ḥgam, ma Raraŋ Aetaniacna memetacna tac bagaraniac ḥgoinap kiprina.

<sup>12</sup> Na aia gidik ḥgoinna ripacrina, an memetacna tac aniacna moça lambirena ma kipca aimo larua minna tıkca, memetmbac ndeacraŋna moça. Aintik aia nanambina minna wanaiŋ. Aia mbopi waekeranande. <sup>13</sup> Na aia an Moses morina tipna kirara, aia ainda mba morenanna. Ma ndona inpaŋanmo injt wanj mbuŋa tamaia, Israelnangepmo an memetacmo tanji tekreica, kocnai maieknnanna wat narica. <sup>14</sup> Na mina iroara kocnaia wattamboracrina. Ainda moça mina an atuna leacatna kam bagarmo, mina memetmbaca watca ninirena, na mina an kamna miňiŋmo, mba garacitndai. Anna an injt waŋna kirar maeacreke, na mina iro inikmo watta mboracrinan. Na ramoot ianna an injt waŋmo mba moa kecariatke. Wanaiŋ. Karais niŋgik mbuŋa Raraŋ Aetaniaca ma an injt waŋmo kactiki kecarinande. <sup>15</sup> Na

---

**3:10** NA 34.29    **3:12** 2 Ko 7.4, na Epe 6.19    **3:13** NA 34.33-35, na Ro 10.4, na Gal 3.23    **3:14** Ais 6.10, na In 12.40, na Up 28.26-27, na Ro 11.7-8, na 11.25

anna gidik, memetmbaca mina Mosesna kam ningikca watca nininirena, an injit waŋa mina iroar inkarmo wiŋga taurkica, kipca mandeacna min. <sup>16</sup> Na ramootta iro inik ŋgetrikica Kacoot ndambuŋa tan te, ma mana injit waŋmo kactiki kecarinande. <sup>17</sup> Na an kidrikca aku Kacootna kam ndoprenanna, aku Neroŋ Ratna kamb ndoprena. Na an Kacootna Neroŋ Rat, ma ramoot ian ndambuŋ ndeac te, an ramootmo reac ianna manmo mba leacitndai, wanainj. Na ma makukar kocor koind. <sup>18</sup> Na aia muruŋcamiňa, reac ianna aina inpaŋanmo angiri ingoroc ŋgocor. Aintik Kacootna memetacna tac aniac aai ndambuŋ nakipca, aia watrena ninikna kirar ndaruca an memetacmo anna metaca tanrenan. Na aia an memetacna tac aniacmo memetmbaca angirenan, na anna ndo aimo moça ŋgetrikica, aia Kacootna ŋgagatracna kirar ŋgoin ndarurina. Na Kacoot, ma Neroŋ Rat, na ma ainda morina.

## 4

### *Aia tiacarpaikna winna kirar*

<sup>1</sup> Na Raraŋ Aetaniaca ma aina moça kakad-maina opotaca mori, ma aimo an aiŋ neaŋgatna, ainda moça aia an aiŋa mo nake, mba bebederenanna. Wanainj. <sup>2</sup> Na aia an ingoroca morena tipemb kirarirmo iŋ neaŋrina. Na

---

**3:16** NA 34.34, na Ais 25.7, na Ro 11.23, na 11.26    **3:17** In 8.32, na 8.36, na Ro 8.2, na 1 Ko 15.45, na 2 Ko 3.6, na Gal 5.1    **3:18** NA 16.7, na 24.17, na Ro 8.29, na 1 Ko 13.12, na 15.49, na 1 Ti 1.11

**4:1** 2 Ko 3.6, na 1 Ti 1.13    **4:2** 1 Ko 1.18, na 2 Ko 2.17, na 6.4, na 6.7, na 1 Te 2.3-5

aia mba an paparuna tipna kirar mbuña mba tañrenanna. Na aia Rarañ Aetaniacna kammo mba ñgetrikirenan. Wanaiñ. Na aia kam gidikmo, raekca waekeca mboprena, na meikramtair, mina ndorita iroar punja mina gaind ndamnjinande, aia Rarañ Aetaniacna lamniacmo, aia aiñ wandoña morena. <sup>3</sup> Na meikramtair ndeidta wiwitta an kam wembañ lañmo aia an wiwitirenanna, matau lamñi garac ñgocor, an wiwitta mina kocnai topnandet. <sup>4</sup> Na Ramoot Mbikca, ma gan tiacarpaikna miripraran, na ma ndo an ripac ñgocorta meikramtairta iroarmo moa mboraca, Karaisna kam wembañ lañna i aniac mina iroar inkara mbukna toawanañ. Aintik mina Karaisna inpañanna ninikmo mba watca rapacrena, ma Rarañ Aetaniacna ninik.

<sup>5</sup> Na ne warac. Aia ndorita tipemb kirarirta nininia mba moreke. Wanaiñ. Aia gainda waekeca mboprena, “Jesus Karaisa ma aina Kacoot, na aia Karaisna kamma rañgairi, aia nena aiñna ramtair ndaruatna.” <sup>6</sup> Na atu ñgoinna Rarañ Aetaniac ma gaindopatna, “Neaupna inikca memetaca kipca larua eacrena.” Na Rarañ Aetaniacna memetacna tac aniac kipca aiap eacnandet, na aina iroar inkarmo memetac aniac neañnandet. Na aia Jesus Karaisna inpañan wattrina, na aia memetac gidikca wattrina,

---

**4:3** 1 Ko 1.18, na 2 Ko 2.15, na 2 Te 2.10    **4:4** In 1.18, na 12.31, na 12.45, na 2 Ko 4.4, na Epe 2.2, na Pil 2.6, na Kol 1.15, na Ib 1.3

**4:5** 1 Ko 1.9, na 1.13, na 1.19, na 1.23, na 2 Ko 1.24    **4:6** RL 1.3, na Ais 9.2, na 2 Ko 3.18, na 1 Pi 2.9, na 2 Pi 1.19

na an memetaca anna Raraŋ Aetaniacna gar-garapa memetacna tac aniacna kirar toc.

**7** Na aia an reac laj ŋgoin ianap eacrenanna, ma tiacarpaikna winna inik ndeacrena kirar. Anna gaind, meikramtairmo muruŋcamiŋa lamnjina moça, an gargar aniacna anna Raraŋ Aetaniacna gargar. Na anna aina gargar wanainj. **8** An taupemb wit aniac, titoc titocna makukar aimo larurenan, na mina aina gargarimo mba moa irikri. Na an reik wit anikca mina aina iroar inkarmo moa paorirenanna, na aina iroar inkara mba kocnaia ŋgocrairi. **9** Na meikramtair mina aimo mo ŋgocraina morenan, Raraŋ Aetaniac, ma aimo mba ke-carirenanna. Na mina aimo pia irikrena, na aia mba kocnaia ŋgocrairi. **10** Na memetmbaca aia Iesusna memenacmo aia ndorita tikembca tıkca aia aŋgira tanjrena. Ainda mo te, Iesusna eteacna watta aina tikemb puŋga tiki wandac-nande. **11** Na aia, aia Iesus Karaisna aiŋa morena, aintik aia memetmbaca an eteacna wat aŋgica eacreke, na meikramtair mina aimo pi menacna towairena. Aintik Iesusna eteacna wat manan toco aina tikemb puŋga tıkca wandacrena, na an tikca menacrenan. **12** Aintik memenac ma aina aiŋa morena. Na eteacna wat ma nen Korinnanta meikramtairta aiŋa morena.

**13** Na aia Jesusa ripacrena, an tipna kirara Raraŋ Aetaniacna timbigta kap mboprina kamna

**4:7** 1 Ko 2.5, na 2 Ko 5.1, na 12.9    **4:8** 2 Ko 1.8, na 7.5    **4:10** Ro 8.17, na 1 Ko 15.31, na Pil 3.10, na 1 Pi 4.13    **4:11** Ro 8.36, na 1 Ko 15.31, na 15.49    **4:13** Nŋap 116.10, na Ro 1.12, na 2 Pi 1.1

kirar, “Aku Raraŋ Aetaniaca ripacatna, ainda moca aku an kam ndoprina.” Ai toco ripacrena, aintik ai toco an wiwitia mboprena. **14** Na aia lamnjirina, Raraŋ Aetaniaca ma Kacoot Iesusmo ma moa ŋgepatna, na ma ai motocmo Iesusap moi ŋgepnandet. Na ma aiapa nenap aŋgiri, taŋca ndona kitim ndambuŋa tiknandet. **15** Naaku aindoprinanna, aku lamnjirinan, an reikca aimo muruŋa larurenan, anna nen ŋgotacna. Na an tiŋna kirar mbuŋa Raraŋ Aetaniacna kakadmaina opotaca anna meikramtair witmō larurenan. Te, memetmbaca mina Raraŋ Aetaniacmo kam laŋ neaŋraŋ, te, mana i aniacmo aŋgiri ŋgeprajnandet.

### *Aia ripaci, na aia gargar aŋgirina*

**16** Na aia gaind ndamŋireke, aia Raraŋ Aetaniacna an aiŋa momoa mba ŋaterenanna. Na anna gidik, tik ainanna kocnaia ŋgocrairena. Na anmo aia mindacniŋa morena, na aina iroar inkara ra kabe, kabea ŋgetrikica ŋgaib tarurenan. **17** Na anna gaind, an makukara aimo larurenanna anna reac teker ŋgoiŋ, na ma kidrik tekemmotem ndeacnande. Na iŋmbaia aia tamuŋna auŋmo mbibirac laŋ, laŋ ŋgoiŋ aŋgica iarwara eacraŋnandet. Na an tamuŋna auŋna mbibirac laŋ, ma an makuk teker motemmo kunnandet. **18** Na aia mba an lamniac

---

**4:14** Ro 8.11, na 1 Ko 6.14    **4:15** 1 Ko 3.21, na 2 Ko 1.3-6, na Kol 1.24, na 2 Ti 2.10    **4:16** Ro 7.22, na Epe 3.16, na Kol 3.10, na 1 Pi 3.4    **4:17** Mt 5.12, na Ro 8.17-18, na 1 Pi 1.6    **4:18** Ro 8.24, na 2 Ko 5.7, na Kol 1.16, na Ib 11.1-3

mbuŋa watrena mìnna, reikta keca mba watrennana. Wanainj. Na aia an lamniac mbuŋa wat ŋgocorta mìnna reikca watna gagrarena. Na anna gaind, aia lamniac mbuŋa watrena reikca mina kidrik rocot motemma mba eacitndait. Na an reik laŋga, aina lamniac mbuŋa wat ŋgocorta mìnna reik, mina iarwara eacraŋnandet.

## 5

<sup>1</sup> Na aia gaind ŋgoinna mataua lamniā māiatna. Na gan tiacarpaikna Ndam wanja kaca mandeaca aia an ndeacrenan, na ma ŋgocrai te, anna laŋ aia kac ianap, Raraŋ Aetaniac ma aimo neaŋnande, ma tamuŋna auŋ maeacreke. Na an kacmo ramtaira ndorita pair puŋga mba moatke. Anna ma tamuŋna auŋ maeacreke, na ma iarwara eacraŋnande. <sup>2</sup> Na mandeaca aia an Ndam mbuŋ maeacreke, na aia ŋoica witikca eacrena. Na aia ndorita kac ianna tonṭon aniac ŋgoinna morena, ma mon tamuŋna auŋ maeacreke, na ma aina tikmo tik ŋgapaochna kirar toca moca aimo kitacnandet. <sup>3</sup> Anna aia an aoc te, aia tik kamainda mba eacitndai. <sup>4</sup> Ainda moca gan tiacarpaikna ndamma mandeaca aia an ndeacrenan, aia girgir aŋgireke, na aia ŋoica eacrena. Na anna aind, aia an tikemb bagrarmo mba kocnai tikcariri, wanainj. Aia ndorimo an tik ŋgam aocna, tongorenan, na an kirara aia tik ŋgamma aocrena kirar, na an tik bagar menacrinanna, ma toco an eteacna

wat aŋginandet. <sup>5</sup> Na Raraŋ Aetaniac ma ndo ŋgoin, ma aimo an eteacna wat aŋgiña moca aimo anna naanjira ŋgobacrena. Na ma anna moca aimo Neron Rat neaŋgatna. Na an Neron Rat, anna outna an reikta reac ianna Raraŋ Aetaniac ma aimo injmbaia neaŋ ndopatnan, na aia gaind ndamŋirina, gidik, gidik ŋgoin, an reikmo muruŋa ma aimo neaŋnande.

<sup>6</sup> Na aia anna ndamŋireke, anna ndo aina iroar inkarmo memetmbaca moa gagrarena. Na aia lamŋirena, an min aia an tik bagar ndeacri, aia Kacootapmo, mana auŋa mba eacreke, wanaiŋ. <sup>7</sup> Aia mandeaca r̄ipac ningikca r̄ipaca aia eacraŋ. Na aia reikmo mba watreke, aia an mbuŋa mba eacrena. Na aia an ritipac ningik mbuŋa eacrenan. <sup>8</sup> Na aku mbopatna, aia ndorita iroar inkarmo moi gagra. Na aia tonŋgorinanna, aia ndorita an tik t̄ikcarica, tanca Kacootap mana auŋ minijmo mbibirac laŋ aŋgiña. <sup>9</sup> Aintik aia aiŋ aniac ŋgoinna morena, na aia manap eacrenan, co, aia manapmo eac ŋgocor, anna mindacniŋ, aia mana tonŋorena tipemb kirarirmo anna mo. <sup>10</sup> Anmo aia lamŋirena, aia muruŋcamiŋa Karaisna ritri waparacna taup ndarunande. Na an minna aia tipemb kirarir laiŋga ndorita tik mbuŋa eaca morenan, co, tipemb ŋgorikca aia mo te, aia muruŋa kabe, kabea an opoikca aia

---

**5:5** Ro 8.16, na 8.23, na 2 Ko 1.22, na Epe 1.14, na 2.10    **5:6**  
 Ib 11.13-16    **5:7** Ro 8.24-25, na 1 Ko 13.12, na 2 Ko 4.18, na Ib  
 11.1    **5:8** Pil 1.23    **5:9** Kol 1.10, na 1 Te 4.1    **5:10** LR 12.14,  
 na Ro 2.16, na 14.10, na Gal 6.7, na Kol 3.24-25, na KIEK 22.12

morina, tipembta kirarirta minna opoikca aia anginandet.

*Aia kabena meikramtairmo otacna aiŋap, te,  
mina Raraŋ Aetaniacap nikinik iro kabe ndaruna*

**11** Ainda moça aia Kacootna rugut morenan, na mana kaŋgaukca eacrenan, aintik aia meikramtairta iroar inkarmo, moa ŋgetrikirena, minmo mana ŋipacna moça. Na aia an tipemb kirarir wandoik lainmo mba morenan, wanaiŋ. Raraŋ Aetaniac ma aina iroarapa, tipemb kirarirmo, ma lamnjirena. Na aku gainda ŋipacrina, nena iroar inkar toco, ne gaind ndamnjirena, aia aiŋ wandoikca morenan.

**12** Na aia nemno an kam mbuŋa waia mba mac aoca, ne aimo gaind ndamnjina, aia ramtair wandoik. Wanaiŋ. Aia nemno an kam tiratnanna nemno aina tipemb kirarirmo tongonna moça. Na aia tongorenanna, ne an meikramtaira ndorita irembmo wanaiŋ ŋoinna tongorenammo, mina kammo mac nda ruti, mina meikramtairta iro inik mbuŋa morena tipemb kirarirmo mina mba tongorenanna. Wanaiŋ, mina an lamniac mbuŋa watrena reikmo mina anna tongorenan, na morenanapa kabena meikramtairta nikinik iro mbuŋ ndarurena tipemb kirarir minanmo, mba tongorenan, ne mina kambmo nda ruti mbop. **13** Na anna gidik ecte, aina tipemb kirarirapa, aina kambca ŋaŋaorena ramootna kirar, na aia Raraŋ Aetaniacna aiŋa morenan. Co, aia wandoŋa matau lamŋi te, anna nemno

otacnande. **14** Na Karais, ma ndona mamatjimo aimo neajrina, na anna ndo aimo an aiña mona raupñirenanna. Anna gaind aia mataua lamjia mamairi, ramoot ianna ma aina muruñcamiñna taup aنجica ma menacatna. Na an taup mbuña aia muruña menacrinan. **15** Na ma aina muruñcamiñna taup aنجica ma menacatna, na ma ainda moatke, mandeaca aia eteacna watap eacrena, na aia ndori koindmo, mba lamjia eacrena. Wanaiñ. Na aina taup aنجica menacatna ramootmo aia lamñi, ma mac nda manjepri. Na aia memetmbaca anna ndamñiraj te, eacrañna.

**16** Ainda moça mandeaca aia an meacramootna iro bagarna tipna kirara mba ranjaica ramoot ianna morena tipemb kirarirmo mba ritriitndai. Na anna gidik, ɳgaua aia an meacramootna iro bagarna kirarira rangairi, aia Karaismo ainda moatna. Na mandeaca aia Karaismo an kirar mbuña ainda mba mac moiitndai. **17** Ainda moça ramoot ian, ma Karaisap mìk te, anna laj Rarañ Aetaniac ma manmo moi ramoot ɳgam ɳgoin ndarunande. Na ne matau warac, mandeaca nikinik bagara kocnaia mamairi. Na tip kirar ɳgamma ndo malaruri.

**18** Na Rarañ Aetaniac ma ndo ma an reik wit aniac muruña minij. Na ɳgaua aia mana

---

**5:14** Ro 5.15    **5:15** Ro 14.7-8, na 1 Ko 6.19, na Gal 2.20, na 1 Te 5.10, na 1 Ti 2.6, na 1 Pi 4.2    **5:16** In 6.63, na 15.14, na Pil 3.7-8, na Kol 3.11    **5:17** Ais 43.18, na Ro 8.1, na 8.9-10, na Gal 5.6, na 6.15, na Epe 2.15, na KIEK 21.5    **5:18** Ro 5.10, na Epe 2.16, na Kol 1.20, na 1 Io 2.2

puñnañgepca moça eacri, ma Karais mbuña tīkca ma aimo moa añgira aia manap iro kabea moatna. Na ma aimo gan aiñ neañgatna, aimo ndo ñgotaca ndona puñnañgepmo moi mina manap nikinik iro kabe ndaruna. <sup>19</sup> Na aina kamma anna gaind. Rarañ Aetaniac, ma Karaisna inik ñgaoca, an meikramtaírmo muruñcamiña moi mina puñnañgepta tipna kirar tīkcarica mina manap iro kabea mona. Na ma mina morena tipemb ñgorikta makukartake, ma mba lamñitndai. Na ma aimo an kam wiwitina aiñ neañrinan, te, ma an puñnañgepta meikramtaírmo, moi mina manap iro kabea mona. <sup>20</sup> Aintik aia Karaisna up añgica mana kam wiwitirena, na an tipna kirar mbuña Rarañ Aetaniac, ma aina up mbuña meikramtaírmo acrena. Na aia meikramtaírmo Karaisna kambca mboprenan. Na aia minmo aindopatna, “Ne an puñnañgepta tipna kirar pac tīkcarica ne Rarañ Aetaniacap iro kabe ndaruna.” <sup>21</sup> Na Karais ma tip ñgoreacna makukca mba morinanna, anna Rarañ Aetaniaca ai ñgotac ndopca moatna, aintik ma aina muruñcamiña tipemb ñgorikta makukarmo tumbunna tīkca ma Karais nambatta tīkatna, na Karaisa ma tipemb ñgorikta makukca morena ramootna kirar ñgoin malaruat. Na Rarañ Aetaniac ma ainda morina, aia Karaisap eac te, mana gargar mbuña aia Rarañ Aetaniacna lamniacmo,

---

**5:19** Ro 3.23-25, na Kol 1.19-20    **5:20** 2 Ko 3.6, na 6.1, na Epe 6.20    **5:21** Ais 53.6-12, na In 8.46, na Ro 5.19, na 1 Ko 1.30, na Gal 3.13, na Pil 3.9, na Ib 4.14-15, na 1 Pi 2.22-24, na 1 Io 3.5

meikramtair wandoik laij ndarunande.

## 6

*Up aŋgirena ramtaira ndorita aijir puŋga makukar wit mbukrena*

<sup>1</sup> Na aia Raraŋ Aetaniacap aiŋa morenan tik, aia nenmo gagaraca gaindopnande, “Ne Raraŋ Aetaniacna kakadmaina opotaca maŋgirat, na moca ne an kakadmaina opotacmo wanaiŋna kecari nari.” <sup>2</sup> Ainda moca Raraŋ Aetaniac, ma gaindopatna, “Aku an miŋ mbuŋa, aku una nananaea waraca umo otacrenan. Na meacramoot mac nda aŋgina ra, aku unmo otacrenan.” Na ne matau warac! Mandebanna anna oit miŋ laj. Na ne matau warac! Na mandeaca anna Raraŋ Aetaniaca aimo mac nda aŋgina oitna miŋ ndarurena.

<sup>3</sup> Na aia toŋgo ŋgocor, aina morena an aiŋa meikramtairmo anna kome narica, aintik aia reac ianna mba moca an meikramtairta oura riŋa mina mba irikeitndai. Wanaiŋ. <sup>4</sup> Aia Raraŋ Aetaniacna aiŋna ramtaira moca eacrena, aintik aia memetmbaca ndorita tipemb kirarir laijmo meikramtairmo muruŋcamiŋa minmo gainda wandac. Na an titoc, titocna reikapa, reikca aimo mo ŋgocrairenanapa, makukar larurenan aia witik gagraca eacnande. <sup>5</sup> Na mina aimo pirena. Na mina aimo kac ŋgoreacna inikca tikrena. Na puŋnaŋgepca aimo pia kam keca aimo ootrena. Na aia aij gargar ŋgoinna morena, na aia mba

---

**6:1** 1 Ko 3.9, na 2 Ko 5.20, na Ib 12.15    **6:2** Ais 49.8, na Lk 4.19-21    **6:3** Ro 14.13, na 1 Ko 9.12, na 10.32    **6:4** 2 Ko 4.2

**6:5** Up 16.23, na 2 Ko 11.23-27

ηαյaria ղօրենանա, նա այ նիկ վապատի անաց այշիրենա. <sup>6</sup> Նա այ տիպ կիրար թաղ ղօրիննա մօրէկ, նա այ լանդամյու լայ այշիրենա. Նա այ կայգա մբա տավիա մօրենանա. Նա այ մեյկրամտայրմօ տիպ կիրար լայ նինջիկցա մօրենա. Նա այ Ներօյ Ռատնա գարգար անացապ. Նա այ նդօրիտա մամատյու գիդիկ ղօրիննա նեայշիրենա, նա այ սպ նինջիկ մբույժա մբա մբօրենանա. <sup>7</sup> Նա այ կամ գիդիկնա կամ մբույժա վիւտիրենա. Նա այ Ռարայ Աէտանիացնա գարգար մբույժա այնա մօրենա. Նա այ տիպ կիրար վանդոյ ղյուտիյա, ան մբույժա րունդուկտա րեաց մօցա պար սմբայպա այշմբայ ղյուտիյա եաշենա. Նա այ ան մբույժա րոյշիրենա.

<sup>8</sup> Նա մեյկրամտայր նծեւա մինա այն անացմօ այշիրա ղյօպրենա, նա մեյկրամտայր նծեւա մինա այն անացմօ մօա իրիքնա. Նա նծեւա մինա այմօ կամ ղօրեաց նծօպցա պէպէրէրենա, նա մեյկրամտայր նծեւա կաբէնա մեյկրամտայրմօ, այն մօրենա տիպէմբ կիրար լայմօ մբօրենան, նա մեյկրամտայր նծեւա մինա լամյիրենա այ պարանա րամտայր, նա ան պարան, աննա ան կամ գիդիկ այ ան վիւտիրենա. <sup>9</sup> Նա ան մեյկրամտայր մինա այմօ ան լամյու ղյօշորտա մեյկրամտայրտա կիրար մօրինա. Նա աննա գայնդ, մինա այմօ լամյու ղյօշորտա կիրար մօրենան, նա մինա այմօ լամյիրենան, նա մինա այմօ մենաց նծօպրենա, նա այ մբա մենաքրէկ, նա այ գիրցիր այշիրենան, նա այ մայաքրէկ. <sup>10</sup> Նա աննա գայնդ, այն նիկնիկ իրօ մակուկ անաց ղօրինապ եաշենան, նա աննա լայ անմօ մինձանյա մօ, նա մեմետմբացա այ

---

**6:6** 1 Ti 4.12    **6:7** 1 Ko 2.4, նա 2 Ko 10.4, նա Epe 6.11-13, նա  
2 Ti 4.7    **6:9** Nap 118.18, նա 1 Ko 4.9, նա 2 Ko 4.2, նա 4.9-10  
**6:10** 2 Ko 7.4, նա Pil 2.17, նա Kol 1.24

toñtoñ ningikca morena. Na aia reik kocorta ndaekpembta meikramtairta kirar toc ndeacrenan, na anna lañ, anmo aia mindacniña moa aia meikramtairmo reik wit aniac ançina moa otacrena. Na anna gaind, aia reac ianap eac ñgocor, mindacniñ aia reik wit aniacap eacrena.

<sup>11</sup> Na ne Korinnançgepca, aia nenmo wandonj ñgoinna aindopnande. Aia nenmo ndorita iroar inkara nenmo murunj ñgoinna neañrina. <sup>12</sup> Na aia nenmo ndorita nikinik iroara neañ nake mba ñaterenanna. Wanaiñ. Aia nenmo toñtoñ aniac ñgoin. Na ne ndori, ne ndorita iroar inkara aimo neañ narica karirena, na nena iroar inkara aiap mba eacreke, wanaiñ. <sup>13</sup> Na mandeaca aku nenmo, aetta ndona mombonik ndopekna kirar mambopek. Na aia nena morena tipna kirar ñgoinna, ne ainda mo. Na ne toco ndorita iroar inkarmo murunja aimo neañ.

*Aia Rarañ Aetaniacna Kacna kirar toc  
ndeacrena*

<sup>14</sup> Na an ripac ñgocorta meikramtair ndeacrenan, mina iro dam ian ndarurina, aintik ne minapmo kai miñ teac, na minmo kai otaca mina morena tipemb kirarimo kai mo teac. Kari. Titoca tikca tip wandoñ lañapa tip wandikca nda ipuñrenanna, maniña tumbunna titoca tikit? Na titoca tikca memetaca neaupap tumbunna tikit?  
<sup>15</sup> Aintik Karais, ma Ramoot Mbíkap nikinik iro kabe moa eacre ki, a? Na titoca tikca ripacrina ramootapa ripac ñgocorta ramootta maniña

iro kabe aŋgica eacit? **16** Na titoca tikkca aia Raraŋ Aetaniacna Kac ratapa mîrpemembrarainja kacmo aŋgica maniŋmo tumbunna tikit? Na aia lamŋirena, aia ndori aia iarwarna eteacna watapna Raraŋ Aetaniacna Kac ndeacrena, na atua Raraŋ Aetaniaca gaindopatna, “Aku nenap eacnande, na aku nenap nena rîkca nenap tanraŋnandet. Na aku mina Raraŋ Aetaniaca eacraŋnandet, na mina aukna meikramtaira eacnandet.” **17** Na Kacootta ma aindoprina, “Ne an ritipaik kocorta meikramtairmo tîkcarica, ne mina rîkca minap kai mac eac teac, na ne mon kabena taupca tanca an ndeac. Na ne an wandik tîkrina reac ianna kai utiŋ teac, aku nenmo aŋginandet. **18** Na aku nena Aet ndeacnandet, na ne aukna nuikapa mombour ndeacnandet.” Na Kacoott, ma Raraŋ Aetaniac, Ma Gargar Muruŋapnan, na ma ndo aindoprina.

## 7

**1** Na min ne aukna aikor koind, aia an Raraŋ Aetaniacna babuatna bababuara aia aŋgira maimiri. Aintik aia ndorita tikembta tipemb kirarir ŋgorik teacrena patiŋapa, ndorita ŋerŋgaur teacrena patiŋmo muruŋcamiŋmo mo kecarica, na Raraŋ Aetaniacna lamniacmo aia muruŋa ŋgaib taruna. Na aia Raraŋ Aetaniacna rugut moca, tip kirar rat gidik, gidik ŋgoinmo memetmbaca rangairan.

---

**6:16** TN 26.12, na Esi 37.27, na 1 Ko 3.16, na 6.19      **6:17** Ais 52.11, na Esi 20.34, na 2 Ko 7.1, na KIEK 18.4      **6:18** 2 Sml 7.14, na 1 Nin 17.13, na Ais 43.6, na Ier 31.9, na KIEK 1.8, na 21.7      **7:1** 2 Ko 6.17-18, na 1 Io 3.3

*Korinnan̄gepca iroar inkar ȱgetrikiri, Pola  
toŋtoŋ bagaraniac ȱgoin*

<sup>2</sup> Na ne aimo ndorita nikinik iroarmo aia neaŋ. Na aia ramoot ianmo t̄ip ȱgoreac ianna mba morenanna. Na aia ianmo moi ȱgocrai ȱgocor. Na aia ramoot ianmo paruca mana reac ianna aŋgi ȱgocor. <sup>3</sup> Na aku nenmo outna mbopatna kamma aku nena ritri waparaca mo nake mba mbopatke, wanaiŋ. Aku gaindopatna. Aia ndorita nikinik iroarmo aia nena neaŋgatna. Aintik ne menac te, laŋ ai toco nenap men-acnande. Na ne eteacna wat aŋgi te, laŋ ai toco nenap an eteacna wat aŋgiande. <sup>4</sup> Na aku nenmo wandoŋ gidik ȱgoin mambopek, na aku nenmo řipacrena. Na aku nena toŋtoŋ bagaraniac ȱgoin. Na an makukara aimo laruren-an, aku nena ndamnjirena, na anna ndo aukna iromo moca aku wetwet laŋan ȱgoin ndeacrena, na aku toŋtoŋ aniac ȱgoin.

<sup>5</sup> Na ȱgaua aia Masedonia eacri, na an toco aina tikembca emtemma wič emtem aŋgi ȱgocor. Wanain. Na titoc, titocna makukara aimo larurina. Na meikramtaira aimo ipuŋreke, na aia ndorita iroar inkar puŋga rugut morina. <sup>6</sup> Na Raraŋ Aetaniac ma meikramtaira makukarap eacrenanmo, ma mina iroar inkarmo moa wewettarena. Aintik ma Tatusmo mandaca ma ai ndambuŋ ndaruatna, an mbuŋa ma aina iroar inkarmo moa wewet-tatna. <sup>7</sup> Na an taup mbuŋa Raraŋ Aetaniac, ma aina iroar inkarmo an niŋgik mbuŋa mba moa

---

**7:2** Up 20.33, na 2 Ko 12.17    **7:3** 2 Ko 6.11-12    **7:5** 2 Ko 2.13

**7:6** 2 Ko 1.3-4, na 2.13

wewettarenanna. Wanaiñ. Outta ne Taitusna iro inikca moa wewettari, na ma aimo an nena moatna tipna kirarna kam ndopatna. Aintik an tipna kirara Rarañ Aetaniac ma aina iroar inkar motocmo ma ainda moa wewettarena. Na Taitus ma gaindopatna, ne kadmaica aukca watna tonthonjap, na nena iroar inkara aukap iro kabe ndaruna moca tamtam ñgoin ndamnjirena. Ainda moca aku tonþonj ñgoin.

<sup>8</sup> Na aku lamnjirena, aukna timbiñ rapara nena iroar inkarmo moca ne makukurina, na aku an nake iro ñgoreaca mba anjiri. Na anna gidik, ñgaua aku anna iro ñgoreac anjirina, na mandeaca, wanaiñ. Na aku lamnjirena, an timbiñ rapara nenmo moca ne makukurina, na anna ma kidrik tekemmotem ndeacnande. <sup>9</sup> Na mandeaca aku matonjgori. Na an tonþoja anna nena makukartake, mba tonjgori. Wanaiñ. Aku tonjgorinanna, anna an makukapa numbira nenmo moca ne iroar inkar ñgetrikina moatna. Na aku lamnjirena. Rarañ Aetaniac, ma ndo nenmo an makukarta iroar inkarapa numbira neaþrenan, aintik aina kambca nenmo emtemma moi ñgocrai ñgocor. Wanaiñ. <sup>10</sup> Na iroar inkarapa numbira moa ñgocrairenan anna Rarañ Aetaniac moa larurena, an mbuña aia meacramoota iro inik ñgetrikirenan. Aintik Rarañ Aetaniaca ma aimo mac nda anginandet. Na gan tiacarpaikna meikramtairta iroar inkarapa numbirta tip kirara, anna ma memenaca moa larurena. <sup>11</sup> Na

ne anna moca matau lamñiranj. Na an kakadmaica Rarañ Aetaniaca nena neañrina, na ma nenmo tiþemb kirarir iro, iroar lainj koinda moa larurena. Na anna ma nenmo tawi moca, na ne ñgePCA ndorita mboprina kambta kam wandonjaina. Na ma nenmo moca ne ñgePCA an tip ñgoreaca morena ramootmo kaega mo, na ne Rarañ Aetaniac nake rugut mo. Na nena iro inikca ne aimo watna toñtonap, na ne gagraca an tip ñgoreaca morinanmo moi wandonjai. Na an aijira ne morenanna, anna ma waekeca nenmo wandacrena, ne makukar kocor.

<sup>12</sup> Na anna gidik, ñgaua aku nenmo tiratna timbiñ rapara aku tip ñgoreaca morina ramoot ian nake mba tiratke. Na aku kabena ramootna moCA mba lamñirenán, ma an ramootmo makukca neañrinan. Wanainj. Na aku tongorina, nena tipna kirar laiñmo moi larui raekca tik, Rarañ Aetaniacna lamniac, ma mawatreke, na ne gaind ñgoinna matau lamñi. Na ne aina moCA toñton aniac ñgoinna morena. Anna moCA aku an timbiñ rapara tiratna. <sup>13</sup> Na nena an tipemb kirarira ndo aina iroar inkarmo moa wewettarina.

Na aia toñtoñ ñgoin. Na ne Tatusna nikinik iromo moCA ma wat aŋgica, ma tongoatna. Na aia anna watca aia toñtoñ weperai aniac ñgoin. <sup>14</sup> Na ñgaua aku nena imo Tatusna outta tikca aŋgira ñgepatke, aku ndona an mbopatna kamna numbira mba mori. Wanainj. Na an kamb wit anikca aia nenmo mboprinanna, anna gidik. Na aintocna kirar ñgoinna mandeaca Tatusa malamñiat, an kamma aia moCA nena i

aŋgira ɳgepatnanna, anna gidik ɳgoin. <sup>15</sup> Na Taitus ma nen ndambuŋ ndaruatke, ne reik nekri rugut moça manmo aŋgica, ne muruŋa mana kamma rāngairina. Aintik ma nen ndamnjia ma ndona nikinik iromø neaŋgatna. <sup>16</sup> Na mandeaca aku tonṭonj ɳgoin, annaaku ripaca gagararina, an tipemb kirarirmo ne muruŋa matau monande, anna moçaaku ton̄gorena.

## **Korinnanda kituknduk ɳgobaca Iudiana ripacrena laiplacarmo neaŋnandet**

### **8**

(8—9)

*Ripacrena laiplacara kitukndukmo ɳgobaca  
Iudiananmo neaŋnandet*

<sup>1</sup> Na ne Iesusa ripacrena laiplacar, aia nenmo mbopca mawaracek, Raranj Aetanicna morena tipna kirarirmo, ma Iesusna ritipaipta meikramtairta tumnambca Masedonianana pitrik waŋna inik ndeacrenammo, kadmaica ma minmo otacatna. <sup>2</sup> Na Masedonianandmo makuk bagaraniaca minmo laruatna, anna mina iroar inkara towaiatna. Na an minna mina reik kocor koind ndeacrina. Na anmo mina mindacniŋna moça, mina tonṭonj aniacap eacrina. Aintik mina ndorita ripacrena laiplacar ndeid ɳgotacna ndamnjica mina kitukndukar wit anikapa ainta reik aŋgira ɳgobaca mina neaŋna moça. <sup>3</sup> Na aku matau mbop waekena mamoek, mina ndorita tonṭonja

raŋgaica an kitukndukca neaŋrina. Na mina ndorita reikta ŋgaŋganŋgina toŋtoŋna mìn mbuŋa mina neaŋrena. Na mina an reikmo kunda, mina kabena reikmo mbat mac tıkca minmo moa kunda neaŋrina. <sup>4</sup> Na mina gagraria, aimo ndorimo watcarica mina Iesusna ritiipaikta meikramtairta tumnambta ndeida, mbukca minap tıkca aŋja moca Raraŋ Aetaniacna Iudia ndeacrena meikramtairmo otacna moca kam gargar ndopatna. <sup>5</sup> Na ŋgaua aia aind ndamŋiatna. Mina aimo kitukndukar ningikca neaŋnande. Na mina ainda mba moatke. Wanaiŋ. Outta mina ndorimo Kacootta neaŋgatna, na mina Raraŋ Aetaniacna toŋtoŋraŋgaica mitoco ndorimo aia neaŋgatna. Na an tipna kirar minanna, ammo kunda tamuŋmbai.

<sup>6</sup> Na ŋgaua Taitusa kakadmaina opotacna aŋjmo nena ríkca tıkca aŋgira ŋgepatna. Aintik aia manmo gagraca mambopat, ma an aŋjmo moi korwina. <sup>7</sup> Na an reikca muruŋa ne anna morenanna, an tipna kirara anna laŋ laŋ ŋgoin. Na ne Raraŋ Aetaniacmo matau ripacrena, na ne mataua ripaca gagrarena, na ne ritipacna kam ndopna aŋjmo gargara morena. Na ne landamŋi wítap, na ne Raraŋ Aetaniacna aŋja mona tik ŋgeprena. Ainda moca ne aina kambmo waraca, na ne kabena meikramtairmo matŋirena. Anna laŋ, mandeaca aintocna kirar ŋgoinna ne an kakadmaina opotacna aŋj motocmo aind ŋgoinna gagraca moraŋ.

<sup>8</sup> Anna gaind, aku nenmo anna raŋgaina

kam gargara mba mbopri, wanainj. Aku nenmo kam landamnji niŋgikca an ndoprena, meikramtair ndeida mina iroar inkara an aiŋa matau mona tik ŋgeprena, na an kirara aku nena towairena. Anna aimo garacna, nena kabena meikramtairmo matŋirenanna, anna reac gidik ŋgoin. <sup>9</sup> Na aina Kacoot Jesus Karaisna kakadmai mananmo, ne lamŋia mairina. Na ma reik wit anikapna ramoot, na ma reik kocorta ramootna kirar toc ndarurina, ri, ma nenmo otaca, na ne reik wit anik anŋinande.

<sup>10</sup> Na mandeaca aku ndona iromo, aku nenmo tik larunandet, na nenmo an kitukndukar ŋgobacrena aiŋa mona. Na gan maiapekna iar, ne an aiŋa anŋira moa ŋgeprina. Na nena an aiŋa momona tonŋtonja aniac ŋgoin. <sup>11</sup> Na mandeaca anna laŋ, ne gagraca an aiŋa ŋaŋari moi korwina. Na ŋgaua nena iroara an aiŋa mona ŋgeprena, na aintocna kirara, mandeaca ne aintocna kirara tawina moi korwina, an ndorita reikta ŋganŋangina miŋ mbuŋ. <sup>12</sup> Na ramootta reik wit neaŋna tonŋtonj aniacap eac te, Raraŋ Aetaniac ma anŋina tonŋorena. Na Raraŋ Aetaniac, ma lamŋirena, an ramoot kabe kabea, neaŋ ndoprina miŋna reikmo, ma an reikmo ma anŋinandet. Na ma an reik kocorta ramootna ritri waparaca ma an nake mba moitndai.

<sup>13</sup> Ainda moça aku gainda mba mbopri, ne makukar mbukna, te, mina ndeida laiŋ ndeacna. Wanainj. Aku tonŋgorinanna aia muruŋa an miŋ kabe ŋgoinna tipemb kirarira kabena

meikramtairmo mona. <sup>14</sup> Na gan mandeacna minna ne reik wit anik koindap eacrena, na ne an reik ndeidmo an matpirina, meikramtairmo otacna min. Na ijmbaia ne matpi te, na mina reik wítap eac te, mina nen ̱ngotacna reikca mina nenmo otacnande. Aintik ne murunjcamina an tip kirar kabea moça ne murunjcamina eteac laj ndeacnande. <sup>15</sup> Na anna Rarañ Aetaniacna timbigta kap mboprina kamna kirar, “Ramootta amna reac menamo wit naangirinan, an amna reaca manmo mba kundri. Na ramootta mbatepnij naangirinan, man ndambuña mba matpiitndai.”

*Pola ma ramtair ndeidmo Korinna tañna  
mbagiriatna*

<sup>16</sup> Aintik aku Rarañ Aetaniacmo kam laj neaŋrina, ma Taitusna iro inikmo moa ̱ngeprina, na ma aina irona kirar. Na ma toco, nen ̱ngotacna tonþon bagaraniac ̱ngoin. <sup>17</sup> Na aia manmo nen ndambuña mac nda tañna digirinan, na ma tonþorina. Na ma aina kamma waraca rangairina. Na ma toco, an aiñna tonþon aniac ̱ngoin, aintik ma ndona tonþon mbuña nen ndambuñ nakipatna. <sup>18</sup> Na aia manmo ndorita Iesusa ripacrena laiplacarta ianap mbagirica kipatna. Na an Iesusna ritipaikta meikramtairta tumnambta inikmo, ma kam wembañ laj wiwitina, aiñna iapna Iesusa ripacrena laiplacarta ian. <sup>19</sup> Na an aiñ niñgikca wanainj. Na Iesusna ritipaikta meikramtairta tumnambca, manmo larapaca ma aiap tañca,

ai ɳgotaca an kakadmaina opotacna aiŋa mona moca. Na aia an aiŋa moca Kacootna i aniac aŋgiri ɳgepna, te, meikramtairmo wandaca mina lamjina, aina iro inikca an aiŋa momona toŋtoŋa ɳgeprena. <sup>20</sup> Na wanain naaŋgirina opotac lanja aiŋa meikramtaira aimo neaŋrinanmo, ramoot ianna aina an raupnjirena tip kirarmo, kam ɳgoreaca kai mbop teac. Na aia anna mba tongorenan. Aintik ne an kakamo mbagirica ma aiap kiprina. <sup>21</sup> Na aia tip kirar laŋ ningikca mona landamŋiap eacrena, na Kacootna lamniac ningik mbuŋa mba moatna, wanain. Aia meikramtairta lamnik toco aia an tip kirar laŋmo moatna.

<sup>22</sup> Na aia ndorita kabena kaka ianmo mbagirica ma maniŋap kipatna. Na oit witca aia manmo aiŋir witna iro, iro towaica, aia watrina ma an aiŋira mona gargara miŋ. Ainda moca ma lamnjirena, ne tipemb kirarir laŋ tingikca morenan. Aintik mandeaca ma an aiŋmo morenanna ma toŋtoŋ aniacap.\*

<sup>23</sup> Na Tatusmo ne manmo gaind ndamŋiatna. Ma aukna urum ndamoot, na aukna aiŋ kabena ramoot, na anja nen ɳgotacna aiŋa morena. Na aina Iesusa ripacrena laplacau-niŋmo, ne gaind ɳgoinna matau lamŋi. Maniŋa Iesusna ritiipaikta meikramtairta tumnambta aiŋna ramootniŋa moca eacrena. Na maniŋa

---

<sup>8:21</sup> ML 3.4, na Ro 12.17, na Pil 4.8, na 1 Pi 2.12    \* <sup>8:22</sup> Na Pola mboprena an kakaniŋa Tatusap Korinna taŋgatna ramootniŋna iniŋa aia mba lamnjirena. Pola maniŋa nininimo gan sapta wes 18 taŋca wes 20na miŋ, na wes 22 toco ma eacrina.

ndoniŋna aiŋ mbuŋa Karaisna i aniac aŋgira ŋgeprena. <sup>24</sup> Na anna laŋ, ne an tipemb kirarir laiŋmo an ramtairmo mo. Na ne ainda mo te, Iesusna ritipaikta meikramtairta tum-nambca, mina lamŋi rapacnande, nena kabena meikramtairmo mamatŋia morena tipna kirara mina lamŋinande, ainda moca aia nena aiŋna moca nena imo aŋgi ŋgeprenan.

## 9

*Korinnanŋgepca Raraŋ Aetaniacna  
meikramtairmo otacrena*

<sup>1</sup> Na ne malamŋireke, an wanaiŋa neaŋrena opotac laja aia Raraŋ Aetaniacna meikramtair ŋgotacrenanmo, aia aŋgi punirena. Aintik aku anna kamma rocotta mba tiritndai. <sup>2</sup> Na aku lamŋirena, nena iroar inkara an opotacna aiŋa mona ŋgepatna, ainda moca aku memetmbaca nena imo Masedoniananŋgepta outta tikkca aŋgira ŋgepatna. Na aku gaintopatna, “Outna iara Akaiana pitrik waŋna meikramtair tikca an aiŋa moi ŋgep ndopca kocroatna.” Na mina nenmo an aiŋa moi gagrana kam mbaracatke, anna ndo Masedoniananŋgepta ndeidta iroara moa ŋgepca mitoco, an aiŋa moatna. <sup>3</sup> Na aku tonggo ŋgocor, aia nena i aŋgiri ŋgep ndopca mbopatna an kamma ŋarikca kam kamaind ndaru nari. Na aku min ndopatna kamna kirara, ne kocroca lambi. Na aku an taupna ndamŋica mbopatna, ainda moca aku Iesusa ripacrena laiplacarmo anna mandacatna. <sup>4</sup> Na aia gidik

ηgoinna r̄ipacrina, ne an reikca ηgobacrinamo ne neaŋnande. Aintik aku gaind ndamnjirena, ɻarikca Masedoniana ndeida aukap kip te, na ne ηgobac ηgocor ndeaceknanna wat te, moca aiapa nenap an numbir aŋgi nari. <sup>5</sup> Aintik aku ndo mbunja gaind ndamnjirina, aku Iesusa ripacrena laiplacarmo mbopca mina outta taŋca nen ndambuŋ ndaruca, nena wanaiŋa neaŋna ndopca kocrorina opotacna reik laiŋ neaŋ taŋna. Na an minna aku kip te, mina watnandet, ne an wanaiŋa otacna reik laiŋga ne matau ηgobaca an opotaca reac gidik ηgoinna mo, na anmo aia nena para mba t̄ikca an kitukndukapa reikmo wanaiŋa wiŋga aŋgiatna, wanaiŋ.

<sup>6</sup> Na ne anmo matau ηgoinna gaind ndamŋi. Ramootta amta reikmo mbateepniŋa mutoc te, ma amta reikmo mbatep niŋgik naaŋginande. Na ramootta ma witca mutoc te, ma amta reik wit naaŋginande. <sup>7</sup> Aintik ne muruŋcamiŋ nena kabe, kabea ndorita iroar inkarmo matau ηgore garaca an iroar niŋgikca raŋgaica reik neaŋ. Na ɻarikca ramoot ian, ma reac neaŋ narica ɻaterenan, na ma gaind ndamŋi nari, meikramtaɪr ndeida manmo ɻarikca timndaca ma neaŋ te. Anna laŋa wanaiŋ, anna ηgoreac, na ramootta reac neaŋrenanna ma tɔŋtonŋap neaŋ, Raraŋ Aetaniac ma an tip kirara tonŋorena. <sup>8</sup> Na Raraŋ Aetaniac ma miŋ, mana wanaiŋa neaŋrena opotacna reik ma nemmo muruŋcamiŋa neaŋga ne muruŋcamiŋa minna t̄iknande. Aintik memetmbaca ne reikca miŋ

---

**9:6** ML 11.24, na 22.9, na Ro 12.8, na Gal 6.7-9    **9:7** TW 15.7,  
na ML 11.25, na Ro 12.8    **9:8** ML 28.27, na Pil 4.19

ŋgoin ndeacraŋnande. Na ne reac, reaca mìn,  
ne an puŋga ainjir laiŋ wit anik koinda monande.  
**9** Na Raraŋ Aetaniacna timbigta kapca, an tipna  
kirarna kammo gaindopatna,

“Ramootta an ndaekpembta meikramtairmo  
reik wit anik ŋgotacrenan,  
anna ma gindamori toc,  
ramootta mutocrena amna reac loormo tam-  
tam nakerina.  
Na mana an tip kirar wandoj mananna  
iarwar ndeacraŋnande.”

**10** Na Raraŋ Aetaniac, ma ndo mutocrena reikmo  
meikramtairmo an amta reikta lour neaŋrena,  
na titoc, titocna amta reikmo, ma meikramtair  
wit anikmo neaŋreke, mina ambrena. Na  
gidik Raraŋ Aetaniac, ma reikca nenmo minna  
neaŋrena, na ne an ripacrina laiplacar ndeidmo  
otac. Na tipemb kirarir wandoik nenanna  
anna anik ndaruranŋnande, an tipna kirarira  
gind tocna kirar, ramootta amna reacna loor  
mutoc te, injmbaia an amna reaca memetmbac  
ŋgerraŋnande. **11** Na Raraŋ Aetaniaca  
nenmo reik wit anikca neaŋnande, na ne kabena  
meikramtairmo, reik wit anikca neaŋna mìn. Na  
an aina aiŋ mbuŋa nena an wanaiŋa neaŋrina  
opotac laŋa anna ndo meikramtairmo moča  
mina Raraŋ Aetaniacmo kam laŋ neaŋnande.  
**12** Aintik an aiŋa ne moeknanna, anna Raraŋ Ae-  
taniacna meikramtair ŋgotacnan, na mina mba

mac matpiitndai, na an puŋga mina Raraŋ Aetaniacmo kam laŋa memetmbaca neaŋraŋnande.

<sup>13</sup> Na an aiŋa ne moeknanna anna min ŋgotacna aiŋ, na anna ndo nena t̄ipemb kirarir laiŋmo raekca wandacnande. Te, mina lamŋinande, ne Karaisna kammo matau ŋgoinna raŋgaica mana kam wembaŋ laiŋmo matau aŋgirena. Na mina watnandet, ne minmo wanainja opotac laŋ aniac neaŋrena, na ne toco an kabena meikramtairmo neaŋrena. Ne ainda mo te, mina Raraŋ Aetaniacna i aŋgiri ŋgepnande. <sup>14</sup> Na mina lamŋinande, Raraŋ Aetaniacna kakadmai bagaraniaca nenap eacrena. Na mina nenmo t̄on̄toŋ bagaraniac ŋgoin, aintik mina Raraŋ Aetaniacmo mbendeica ma nenmo otacnande.

<sup>15</sup> Na an wanaiŋa neaŋgatna opotac laŋa anna Raraŋ Aetaniacna reac bagaraniac ŋgoin, na aia anna kamma kocnai mbopna minna wanaiŋ. Na aia an wanaiŋa neaŋgatna opotac laŋna moca Raraŋ Aetaniacmo kam laŋ neaŋrena.

## Pola ndona aiŋna kam ndoprina

### 10

(10—13)

*Pola meikramtaira mana aiŋa moi irikna morena meikramtairta kam mac nda rutica mbo-prina*

<sup>1</sup> Na meikramtair ndeid, mina aukmo kekelamun irikca aukmo gaindoprena, “Pol ma aiap eacekna minna ma ndomo aŋgira irikca wičin ŋgoin ndeacrena, na maica ma aimo

tikcarica tawanna tan te, ma aimo kam gargar ndoprajnande.” Na aku Pol, aku tongorinanna ne Karaisna tipemb kirarimo pac wat, ma ndona imo mo irikrena, na ma ndona iro inik ndonanmo wattacarica wetwet ηgoin ndeacri, na ma meikramtairmo matau ηgoinna morena, aintik aku nenmo reac ianna digdigiap. <sup>2</sup> Na aku nenmo gainda digindet, injmbaia aku nen ndambuŋ ndaru te, na ne rugut mo, moça aku nenmo kam gidik ηgoinna gargar ndopnande. Na aku ndomo gidikca gaind ηgoin ndamjirena, aku kam gargaraku mbopnande, nena meikramtair ndeida mina aimo gaind ndamjirena, aia gan tiacarpaikna tipemb kirarira ranjairena. <sup>3</sup> Na anna gidik, aia tiacarpaikna meacramoot eacrena kirara taŋrena, na aia tiacarpaikna meacramoot ruŋrena kirara mba ruŋrenanna. <sup>4</sup> Na runduikta reik wit anikca aia anjirina, na anna gan tiacarpaikna reikca wanaiŋ. Mina Raraŋ Aetaniacna gargarap, na mina min, mina an puŋnaŋgepta mbaboar gagrar anikmo tapinande. <sup>5</sup> Aintik an paparuna kambca meikramtairmo taupemb mboraca mina Raraŋ Aetaniacna landamŋi anginanapa, titocna landamŋiara meikramtairta iroar puŋga larurenano aia muruŋa moi irikrenan. Na meikramtairta iroar landamŋiarmo aia muruŋa leacrenan, te, mina iroara moi ηgepca mina Karaisna tonŋoŋa ranjaina. <sup>6</sup> Na aia

---

**10:2** 1 Ko 4.21    **10:4** 1 Ko 2.5, na Epe 6.13-17, na 1 Te 5.8, na 1 Ti 1.18    **10:5** 1 Ko 1.19, na 3.19    **10:6** 2 Ko 2.9

nena lambirena. Na ne aina kambca muruŋa warac te, laŋ, na an kamb mac nda ipuŋrena meikramtairmo, aia an opoik ŋgorikmo minmo mac nda rutinande.

**7** Na ne an ndorita lamniac ŋgout ndeacrena reikmo muruŋcamiŋ ŋgoinna matau wat rapac. Na ramoot ian, ma ndo mbuja mataua ripac gagracna Karaisna ramoot ndaru te, laŋ, ma ndona niknik iromonatau lamni, ai toco Karaisna ramoot ndeacrena, an tip kirara ma ndo eacrenan toc. **8** Na Kacoot ma aimo an aiŋa mona iremb anikap neangatna, na anna nena ritipaikca moi gagra te, nenmo mba mo ŋgocraiitndai. Na aku aina morina an aiŋna i angiri ŋgep te, aku anna numbira mba moitndai. **9** Aintik aku mba tongori, ne aukna tirrina timbiŋ raprirta ndamŋica rugutta wanainja kai mo teac. **10** Na anna gidik, meikramtair ndeida mina aukmo gaindoprena, “An Polna timbiŋ raprirta kambca ma titocna gargarap eacrena, na man ŋgoinna ndo kipca aiap mboprenanna, aia manmo watrenanna ma gagrar kocor koind, na ma kam ndondopna kirara ma mba giwaca mboprenan.” **11** Na meikramtaira an kam ndoprenan, mina ndorita iroarmo matau piar keca gaind ŋgoin ndamŋi. Na an minna aia kipca nenap eac te, an tipna kirara aia nenmo moeknanna. Anna an timbiŋ raprira aia tirrinan ŋgoinna ranŋainandet. Na aia tawan ŋgoin, aintik aia nenmo timbiŋ rapar niŋgik tirca neanja

kipatna.

**12** Na aia gainda mba mbopitndai, aia an meikramtair ndeidta kirara mina weraireke, ndorita i angira ngeprena. Na aia gainda mba mbopitndai, aina tipna kirara minanna kirar, wanaiñ. An meikramtair mina ndorita tipemb kirarimo ndorimo ritrica morena. Na ianna ma ndona tipemb kirarimo kabena ramootna tipemb kirarirap tiki ritrinande. Na ainta meikramtair, mina ainda morenan, mina landamñiar kocor koind. **13** Na aia ndorita morena ñgañganñgiapa irembmo angira tamuña titika, aia karirina. Na Rarañ Aetaniaca an ñgañganñgi aimo tikca biñairina ñgañganñgi ningikca rangainande. Na aia an niñgikca rañgaica kipi, nen ndambuñ toco larunande. **14** Na an i aniacapa aiña Rarañ Aetaniaca aia neañrenan, anna nemno kitacrinan. Ainda mocca an minna aia nemno an kambca wiwitirenanna, aia ndorita ñgañganñgiimo mba moa kundrinan, wanaiñ. Na kabena meikramtair ndeida tanj ñgocor ndeacri, aia ndori tingikca outta tanja laruca nemno Korinna meikramtairimo Karaisna kam wembañ lañ angia kiprinan. **15** Na aia ndorita ñgañganñgiimo aia mba kunda werapca ndorita imo an kabena ramtair morena aiñ mbuña mba angira ngeprenanna. Wanaiñ. Rarañ Aetaniaca aimo mona neañgatna aiñmo aia ndorimo wandoñ ningik ñgoinna morena, na aia ainda mo te, nena ritipaikca moi gagaranande,

na aia ainda mo te, aina an aiña nena ríkca aniac ndarunande. <sup>16</sup> Na aia an kam wembaj lajmo nena ijmbai ndeacrena auñembmo wiwitinande. Na aia an kabena ramtaira tañga aiña moa mairina auñembca aia mba tañitndai, moca aia tanca an kabena ramtairta morina aiñ mbuña ndorita imo wanaiñ ñgoin naañgiri ñgep nari.

<sup>17</sup> Na Rarañ Aetaniacna timbigta kapca aindoprina, “Ramootta ndona i añgiri ñgepna ndop te, ma ndona ia kai aنجi ñgep teac, ma Kacootta imo añgiri ñgep.” <sup>18</sup> Na aia lamñirena ramootta ndona i añgira ñgepreke wereirenan, an ramootta ma Rarañ Aetaniacna lamniaca ma iremb kocor. Wanaiñ. Na Kacootta ma ndo ramootna i añgiri ñgep te, an ramoot, ma ndo i gidikap.

## 11

*Polna tip kirara paparuna up añgirena ramtairta tipna kirara wanaiñ*

<sup>1</sup> Aku toñgorinanna ne aukmo watcarica aku kam beberñau emtem ndopna. Anna ne aukmo watcarina min ki? <sup>2</sup> Na Rarañ Aetaniac mana toñtorj aniac ñgoinna meikramtaira muruñcaminj ñgoinna muruña man kabena kañgauk niñgik ndeac, na an tipna kirar auk toco, aku toñtorj aniac ñgoin nemo Karaisa rançaina. Naaku ndo nenmo larapacrina, ne

---

**10:17** Ais 65.16, na Ier 9.24, na 1 Ko 1.31    **10:18** ML 27.2, na Ro 2.29, na 1 Ko 4.4-5    **11:2** Osi 2.19-20, na 1 Ko 4.15, na Gal 4.17-18, na Epe 5.26-27, na Kol 1.28

Karaaisna meikramtair ndarurina, naaku nenmo Karais ndambuŋmo meac ḥgamma tip ḥgoreaca mo ḥgocora manmo ramoot laŋgona warkica taŋrina kirar toc. <sup>3</sup> Naaku an nduopmo aku matau ḥgojinna lamjirena, ma paparuna tipemb kirarimo ma matau ḥgojinna lampjirena, na ma atua Ibmo paruatna. Na moca aintocna reaca nenmo laru nari. Na moca nena iroara moi ḥgocrai nari, na ne an tip kirar wandoŋ laŋ Karaisanan tikkari nari. Naaku an narica rugut morena. <sup>4</sup> Naaku nena rugut morena, aku lamjirena, ramtair ndeid mina nen ndambuŋ ndaruca nenmo kabena Iesusna kam wiwitirena, na an Iesus aia mana kam wiwitirena Iesusna kirara wanain. Na an kirar mbuŋ, ne kabena ḥeroŋ aŋgirena, na anna an ḥeroŋ Ratta ne ḥgaua aŋgiatna kirara wanain. Na ne kabena kam wembaŋ laŋ mac aŋgirena, na anna an ḥgaua aia aŋgirina kam wembaŋ laŋna kirara wanain. Na ramoot ian ma nena rikmo aind mac mo te, laŋ, ne manmo watcarica ma moraŋ.

<sup>5</sup> Na ne warac! Aku lamjirena aku nena outmbai ndeacrena, naaku paparuna up aŋgirena ramtaira, ndorita i aŋgira ḥgeprena ramtairta, kaŋgaukca mba eacrenanna. <sup>6</sup> Na anna gidik, aku kammo ḥanjaritac mbopna landamnia minna wanain, na aukna landamnia emtemma mba matpirinan. Na memetmbaca aia morina tipemb kirarir muruŋcamiŋa nenmo aia wandaca maiatna.

---

**11:3** RL 3.1-5, na 3.13, na In 8.44, na Ib 13.9, na 2 Pi 3.17    **11:4**

Gal 1.7-9    **11:5** 1 Ko 15.10, na 2 Ko 12.11, na Gal 2.6    **11:6** 1

Ko 1.17, na 2.1, na 2.13, na 2 Ko 4.2, na 10.10, na Epe 3.4

**7** Na ne ndori ne lamnjirena, aku nenmo Raraŋ Aetaniacna kam wembəŋ laŋa nenmo wiwitrina, na aku anna opoikca aku mba aŋgirinanna. Na an tipna kirar mbuŋa aku ndomo aŋgira kangaukca tikri, ndomo nena i aŋgiri ŋjep ndopca. Na titoca moča? Na an tipna kirara aku moapeknanna anna tip ŋgoreacna makuk ki, a?

**8** Na aku kitukndukapa, ainta reikmo Iesusna ritipaitka meikramtairta tumnambta ndeidtan aŋgica an mbuŋa ndo ŋgotaca nena rikna aiŋa mona moča. Na an tipna kirara anna aku mina reik makimrina kirar. **9** Na ŋgaua aku nenap eaca reik matpairi, na an minna aku ramoot ianmo makukca neaŋ ŋgocor. Wanainj. Na Iesusa ripacrena laiplacara Masedonia tikcarica kipca Korin ndaruatke, mina ndori aukna matpirlina reikmo moa minna tikrina. Na an reik, aku mataua raupŋia eacri, aku nenmo makuk ianna emtemma mo ŋgocor ŋgoin. Na memetmbaca aku aind ningikca raupŋiranjanande. **10** Na Karaisna kam gidikca aukap eacrena. Na anna gidik ŋgoin, mon Akaiana pitrik waŋmbaina inikna ramoot ianna ma aukmo mba kiracitndai, na aku ndona imo aŋgi ŋgepnandet. **11** Na kaina moča aku ndona aiŋna opoikca aŋgi ŋgocor? Na aku nenmo mba matŋirenan ki? Wanainj ŋgoin. Raraŋ Aetaniaca lamŋirenan, aku nenmo matŋirenan.

**12** Na ramtair ndeid mina taupembta ŋgorerena, na ndorimo aina taupemb aŋgica meikramtairta lamnikmo ndorita i aŋgiri

---

**11:7** 1 Ko 9.12, na 9.18    **11:9** 2 Ko 12.13, na Pil 4.15-18, na 1  
Te 2.9    **11:10** 1 Ko 9.15

ŋgepna morena. Na aku anna taupembca aku moa mboracrena. Na aku aind niŋgikca moraŋnande. <sup>13</sup> Na an ramtair mina paparuna up aŋgirena ramtair, na mina paparuna aiŋa morena ramtair. Na mina ndorita tipemb kirarir ŋgetriki, te, meikramtaira gaind ndamjinandet, mina Karaisna up aŋgiatna ramtair koind. <sup>14</sup> Na ne an nake ŋgep ŋgoreaca kai ŋgep teac. Na aia ndori lamnjirena, Ramoot Mbikca ma ndona tikmo ŋgetrikirenan, na ma ndomo Raraŋ Aetaniacna mbaiŋna aiŋa morena ŋerouŋna kirar toc ndarurena, na ma memetacap eacrena. <sup>15</sup> Aintik anna reac aniac awanaiŋ, na mana mbaiŋna aiŋa morena ramtair, mina ndorimo ŋgetrikica tipemb kirarir wandoik laiŋga momona aiŋna ramtair malaruri. Na iŋmbai mina ndorita morina aiŋna mìnna opoik aŋginande.

*An minna Pola up aŋgirena ramtairta aiŋa morinan, ma makukar wit anikca aŋgiratna*

<sup>16</sup> Na outta aku mbopatna, na mandeaca aku mac mbopna mamoe. Ramoot ian aukmo ŋaŋaona ramootta kai mbop teac. Na ne ndori, ne toŋgo te, lanj, ne aukmo ŋaŋaona ramoot ndop. Aind ecte, ne aukmo pac watcarica, auk toco ndona imo tekemtem pac aŋgiri ŋgepca. <sup>17</sup> Na aku Kacootna toŋtoŋa mba ranjaica aku gan kammo aindopapekna. Wanain. Aku ramoot ŋaŋaona kirar, na aku ndona i aŋgiri

---

**11:13** Ro 16.18, na 2 Ko 2.17, na Gal 1.7, na Pil 3.2, na 2 Pi 2.1, na KIEK 2.2    **11:14** Gal 1.8    **11:15** 2 Ko 3.9, na Pil 3.19    **11:16** 2 Ko 12.6

ŋgepna nagagararena. **18** Na meikramtair wit anik, mina gan tiacarpaikna tipna kirara ranjaica mina ndorita i aŋgira mangepreke. Na auk toco, an tip kirar kabea ranjaica ndona imo aŋgi ŋgepnandet.

**19** Nena iroar landamniara anik koind, aintik ne toŋgorenan, ne ŋaŋaona ramtairmo watcarica mina nenmo ndorita ŋaŋaona kamb ndoprena! **20** Na anna gidik ŋgoin, ŋarikca ramoot ian ma nenmo wiŋ aŋgica taŋca, ne mana aiŋ wanainja mo te, co, ma nena reikmo kocnaia moa kecariri, co, ma nenmo parua oikna morenan, na ma ainda mo te, ma ramoot aniac ŋgoin ndarunandet, na ma nena indepanaind kap te, anna laŋ, manmo watcarica ma an reikmo ndona toŋtoŋa ranjai morai. **21** Na anna gidik, mina nenmo an tipna kirara ainda morenanna, aia ndori nenmo ainda mona gagrar kocor koind! Aintik aku numbira moca aku wandoŋa waakekeea aindopnande!

Na ramoot ianna ma ndona tipna kirarmo waakekeea wandoŋ ndop te, na auk toco aku gagraca mbopi waekenande. Mandeac aku ŋaŋaoreke mboprena. **22** Mina Iburunanjepnan ki, a? Laŋ, auk toco aku Iburunan. Na mina Israelnanjepnan ki, a? Laŋ, auk toco aku Israelnan. Na mina Abraamna wiwitnan ki, a? Laŋ, auk toco Abraamna wiwitnan. **23** Na mina Karaisna aiŋna ramtair ki, a? Na mandeaca aku ŋaŋaona ramoot mbopapekna kirar ŋgoin. Naaku nenmo Karaisna aiŋ mbuŋa moa kundrina. Naaku ndona aiŋna owowai mbuŋa

aku kundrina. Na mina aukmo kac ŋoreacna inikca kidrikar witca tıkca eacri, na aku gagraca eacrina. Na ramtaira aukmo kidrikar witta pirina, na an mbuŋ aku kunda mon tamuŋ ŋgoin. Na kidrik witca maica aku menaca katrena. <sup>24</sup> Na kidrikar parmbaia Iudananda aukmo ŋoreac ŋgoinna piatna. Na anna inikna kidrikca kabe, kabea mina aukmo pia taŋga 39na mìnna ŋganjangi aŋgiratna. <sup>25</sup> Na kidrikar mbonkaca aukmo monac tip mbuŋa piatna. Na kidrik kabe mina aukmo waut mbuŋa riŋgatna. Na kidrikar mbonkaca laŋgum ŋgocraica aku eacrina, na an kidrikar mbonkacna kidrik ianna aku mouŋ kabeapa ra kabea aku macaitna inik ŋgutirina. <sup>26</sup> Na kidrikar wit, aku tawanna auŋembca taŋrina, na aku gom puik anik kataca maica ŋgocraica kattatna, na an ramtaira taupca taŋreke, makimrena ramtaira mina reik makimrena ramtairta par mbuŋa tıkca. Na aukna kamkabear koinda, mina aukmo mo ŋgocraina moatna, na Iudana meikramtair wanaiŋ toco aukmo mo ŋgocraina moatna. Na maica aku menaca kattatna, an auŋemb anikta inikapa, an mìnna aku ramtair kocorta taup ndeacrina. Na maica aku macaitna inikca tıkca menaca taprekena moatna. Na maica aku paparuna laiplacarta pair punja ŋgocraica kattatna. <sup>27</sup> Na aku gaindta ainjir gagrar anikca morina. Na aku mouŋrempta ainjira moreke, aku mba ŋgorenanna, na aku nik wataica

---

**11:24** TW 25.3    **11:25** Up 14.19, na 16.22, na 27.41    **11:26**

Up 9.23, na 13.50, na 14.15, na 20.3, na 23.10-11    **11:27** Up 20.31, na 1 Ko 4.11, na 2 Ko 6.5

eacrina, na aku puk amna ḥgocrairina. Na aku mba ambrinanna, na waua aukmo moa ḥgocraica, aku ndona tik taurkina tik ḥgapaoa kamaind. <sup>28</sup> Na an ningikca wanaiŋ. Ra, ra aku Iesusna ritipaikta meikramtairta tumnamb raupjina ndamjirena, na anna ndo aukmo makuk aniac neaŋga eacrena. <sup>29</sup> Na Iesusa ripacrena laiplacarta ianna gargara mai te, anna lanj, auk toco ndona tikca rāŋgai lamjinandet, aukna gargar toco mairina. Na anna lanj, ramootta ramoot ianmo moça ma tip ḥgoreacna makukna ḥgirik te, aku ainda morena tipna kirarna kaega monande.

<sup>30</sup> Na taup ianna mac eac ḥgocor ḥgoin te, te, aku ndona imo gidik ḥgoin angi ḥgepnandet, na aku mbopnande, gidik aku gagrar kocor, na aku ndona imo an mbuŋa angiri ḥgepnandet. <sup>31</sup> Na Raraŋ Aetaniac ma Raraŋ Aetaniac, na ma aina Kacoot Iesusna Aet, na ma lamjirena, aku mba paruri. Na aia mana imo memetmbaca iarwara angiri ḥgepraj. <sup>32</sup> Na mon Damaskusa tikca, gagrirta ramoot paŋan Aretasna ramoot paŋan ian ma auŋ aniac Damaskusna tiŋna ḥginanja mona ramtairmo tikatna. Na ma aukmo kac ḥgoreaca tik ndopca. <sup>33</sup> Ri laiplacar ndeida mina aukmo larkam aniacna inikca tikca auŋ aniacna wuoc tamuŋna roumbna tiŋ teker ndiŋa tikca kacrepca irikca wičinna tikri, na aku an ramoot paŋanna parnan kičariatna.

# 12

*Raraŋ Aetaniaca Polmo manmbianmemraŋna tamram mbuŋa kamb wit neaŋgatna*

<sup>1</sup> Na kabena taup ianna mac eac ŋgocor. Na aku ndona imo gidik ŋgoin naaŋgiri ŋgepnandet. Na anna gidik, an taupa aimo mba otacitndai. Na anmo watcari, aku manmbianmemraŋna tamram ndeidapa ingoroca eacrena kamb ndeida Kacootta aukmo wandocrinanna, aku an ndopnande. <sup>2</sup> Na aku lamŋirena Karaisna ramoot ian, iarira 14na mìnna anna iŋmbaia Raraŋ Aetaniaca manmo aŋgia gaca tamuŋna auŋmo, kabemo kunda, mac gaca mbuniŋnan mac kunda, mac gaca mbonkacna auŋa, manmo anna tìkrina. Na ma ndona tikca ŋgetrikiri, co, ma ndona tik anap eacre, aku mba lamŋiri. Na Raraŋ Aetaniac ma ndo lamŋirena. <sup>3-4</sup> Na aku an ramootmo aku lamŋirena, Raraŋ Aetaniaca manmo tamuŋna auŋ naaŋgia gacatnan. Na ma ndona tikap eacre, co, ma ndona tikca ŋgetrikiri, aku lamŋi ŋgocor, Raraŋ Aetaniac ma ndo lamŋirena. Na an tamuŋna auŋa ma waracatna kamma, aintocna kamma ramootta waraca mbopna mìnna wanaiŋ. Na an toco wandik, ramootta mbopna mìnna wanaiŋ. <sup>5</sup> Na aku ndo aku an ramootna i aŋgiri ŋgepnande, na aku ndo ŋgoinna aku ndona ia mba mac aŋgiri ŋgepitndai. Na aku ndo ŋgoinmo gaindopnande, aku gagrar kocor, na aku ndona imo an mbuŋ naaŋgira ŋgeprena.

**6** Na anna gidik, aku ndona i anjiri ηgep ndop te, aku an ηanjaona ramootna kirara mba moitndai. Wanaiŋ. Aku kam gidik ndopnande. Na aku ndona ia mba anjiri ηgepitndai. Na anna gidik, aku tongo ηgocor, ramoot ianna ma aukmo gainda kai lamnj teac, aku ramoot laŋ ηgoin. Na aku tongorinanna, ne aukna morena tipemb kirarira wat te, aukna mbopekna kambca warac. Na an mbuŋa ne aukmo wat rapacnandet.

*Lac tocna reaca Polna tikmo riŋrinan*

**7** Na an kamma Raraŋ Aetaniac, ma aukmo wandacatna, anna reac aniac ηgoin. Na Raraŋ Aetaniac, ma tongo ηgocor, aku ndona imo kai tacro anjiri ηgepcari teac, aintik ma aukmo lac tocna reac ian neaŋga ma aukap eacrena, anna aukna tikca riŋrena. Na an reac, anna aukca pina Ramoot Mbikna aiŋna ηeroŋ, anna aukmo makuk neaŋga aku ndona imo kai tacro anjiri ηgepcari teac. **8** Na kiɖikar mbonkaca aku Kacoottmo mbendeiatna, manmo aukna an reac tarkina moca. **9** Ri, ma aukmo gaindopatna, “Aukna kakadmaina opotaca anna una miŋ. Na an aukna gargara ma gargar ηgoin, ma gagrar kocorta ramootna aiŋa wakikia morena.” Na Kacootta aindoprina, aintik aku gagrar kocor, na aku an mbuŋa ndona imo anjica ηgepnande, na Karaisna gargara ndo aukap eacnande. **10** Aintik ηarikca Karaisna an aiŋ mbuŋa tikca aku gagrar

---

**12:6** 2 Ko 10.8, na 11.16    **12:7** Iop 2.6, na Esi 28.24, na Lk 13.16, na Gal 4.13-14    **12:8** Mt 26.44    **12:9** 2 Ko 11.30, na Pil 4.11-13, na 1 Pi 4.14    **12:10** Ro 5.3, na 2 Ko 7.4, na 13.4

kocortacari te, na meikramtaira aukmo mo laŋa mo ŋgocor, na ainta makukara aukmo larurena, na meikramtaira aukmo mo ŋgocraina morenan, na meikramtaira aukmo kommerena, na iro auknanna an nake makuku ŋgocor, na gidik, an minna aku gagrар kocor, na gan min ŋgoinna tikcapeke, aku gargar aniacap.

*Pol ma Korinnan̄gepta ritipaca moi panpaijina moca*

<sup>11</sup> An kam aku mbopatnanna, anna ŋaŋao ŋgoin. Na anna ne ndori, aukmo moa ŋgepcā aku gaindopatna. Ne aukna i angiri ŋgepte, anna tip wandoŋ laŋ. Na ne ainda mba mori. Gidik, aku reac ŋgoreac, aintik aku nena an outna, paparuna up aŋgirena ramtaira, ndorita i aŋgi ŋgeprena ramtairta kaŋgaukca mba eacrenanna. <sup>12</sup> Na an min aku nena rik ndeacatke, aku reik wit aniac moatna, anna aku ndomo wandacatna, aku up aŋgirena ramoot gidik ian. Na aku wítikca gagraca aku makukar mbukatna, na an tipna kirar mbuŋa aku an ŋagagatracarapa an titoc, titocna Raraŋ Aetaniacna aiŋir anikca nena rik ndaruatnanna, anna aku nemmo ndomo wandacatna, aku Raraŋ Aetaniacna aiŋna ramoot. <sup>13</sup> Na aku kabena laiplacarmo, an tipna kirara moatnanna, an tip kirar kabea, aku kabena Iesusna ritipaikta meikramtairta tumnambmo ainda moatna. Na moca aku nena reac ianna moa matpiri ki? Na moca aku nena an reac kabe niŋgik nenan ki, moa matpia? Na aku ndo ŋgoinna aku nena reac

ianna aŋgi ŋgocor. Na ne aukmo an tip kirara moapeknanmo, ne an tip kirarmo mo kecari.

**14** Laŋ mandeaca aku makocrori, na aku nen ndambuŋ nakikipa kiɖrikara mbonkac mamoeck, na an miŋ toco, aku nenmo makukca mba neaŋitndai. Na ne warac! Aku nena reikca mba aŋgiritndai, aku karirina. Na aku nen niŋgik aŋginandet. Na ne ndori lamnjirena, mombonikca mina amna reacna aiŋa moca aŋgiri tumbunna t̄ikca ndorita ameratera wiramna gargařa minna wanaiŋ. Ameratera ndori amna reik aŋgiri punica mombonikmo otacna aiŋa morenan. **15** Na aku ndo, aku toŋgorena ndona reikmo muruŋcamiŋ ŋgoinna neaŋnande, na ndona tik motocmo, nena ŋerŋgaur ŋgotacna neaŋrena. Na aku ndona mamatŋi muruŋ ŋgoinna nena neaŋrina, na anna ndo nenmo moca ne ndorita mamatŋi muruŋmo aukmo mba neaŋri?

**16** Na meikramtair ndeida mina aukmo gain-doprena, “Gidik ma aina reikmo raekca mba t̄ikca aŋgirenanna, na ma wai aocrena ramoot, na ma paparuna kirara ma aina ŋgumbepa riŋreke. Na ma aina reik aŋgirena.” **17** Na kaica? Na an ramtaira aku nen ndambuŋ mandaca kipatnanna. Anna titoca moca? Na ŋarikca aku paruca mina ianna par mbuŋa nena reik ndeid makimri ki, a? **18** Na aku Taitusmo iroar neanja ma nen ndambuŋ nakipatna, na aku kabena Iesusa ripacrena laiplacarta ian motocmo anna mandaca ma manap kipatna. Na ŋarikca Taitusa

nemmo paruca nena reik makim nari? Wanainj  
ηgoin. Na anja iro kabea ranjairenan, na anja  
taup kabe niŋgik mbuŋa taŋrenan.

**19** Na aku gaind ndamŋirina, ne an timbiŋ  
raparna kambmo muruŋ ηgoinna watta mai-  
rima, na ne gaind malamŋiri, aia nena lamnikmo  
ndorita kam wandoŋaina tirrina. Na ainda  
wanainj. Aia Karaisna meikramtair tarurina, na  
aia Raraŋ Aetaniacna lamniac mbuŋa aia an kam  
ndopatna. Na ne aukna aikndamtair lainj, aia  
an kambca muruŋ ηgoin ndopapeknanna, anna  
nena ritipaikca moi paŋpajina. **20** Ainda moca  
aku rugut emtemma moca gaind ndamŋiatna,  
ŋarikca aku nen ndambuŋ nakipca, na aku  
nemmo aintocna kirarna meikramtaira aku  
tongo watna morenanna eac ηgocor. Na moca  
ne toco aukmo wat te, aku an eacrena ramootna  
kirara mba eacrenan. Na moca aku nena rikmo  
aintocna tipna kirarimo nena rikca tiki wat  
nari, gan tipna kirarira, kam mbuŋ ndopi taŋca  
kabena meikramtairmo iro ηgoreac anŋirena,  
na kaegna kirara morena, na garururena kirara  
morena, na kambmo iŋmbai ndoprena kirara  
morena, na kam mbarac narica morena, na  
reac, reacna kirarira muruŋa moa kurirena.  
**21** Na moca aku nen ndambuŋ nakipca aukna  
Raraŋ Aetaniaca aukmo nena lamnikca tıkca  
aukmo moi numbira mac neanj nari. Na moca  
aku meikramtair wit anikta tipemb ηgorikta  
makukara morinan, mac wat nari. Na mina  
ndorita iroar inkarmo ηgetriki ηgocor, na  
mina an patiŋmo inj neanri, na meacramootna

kanjertaapna tip kirara mona tik njep te, mina meacramootna tip ngadudukca morena tipemb ngorikta makukara monandet, na anna mina ngaua morina tipemb kirarir. Na aku aintocna tipemb kirarira wat te, aku numbira moca kad-mainande.

## 13

*Ne Korinnaŋgeptan ne ndorita ritipaikta  
ŋginajmo matau raupŋi*

<sup>1</sup> Na mandeaca aku nen ndambuŋmo kiɖrik mbonkac nakipna mamoek. Na Raran Aetaniacna timbigta kapca gaindopatna, “Narikca ramootta tip ngoreacna makukca mo te, ramoot mbuniŋ, co, mbonkaca watek, anna aia an kam wandoŋaina miŋ.” <sup>2</sup> Na ngaua aku nenmo mbopatna, na iŋmbaia aku mac mbopatna, anna aku nenapmo kiɖrik mbuniŋa eacatna miŋ. Na mandeaca aku nenap mba eacreke, na aku an n̄gauna tip ngoreacna makukca morina meikramtair, aku gan timbiŋ rapara mina tiratna, na an minna meikramtair motocap, na n̄arikca aku mac nda kip te, aku an tip ngoreacna makukca morenanmo aku minmo wanaiŋa mba wataritndait. <sup>3</sup> Na ne ndorimo garacna moça, Karais ma ndona kambca gidikca aukna up mbuŋa t̄ikca mbopre ki, co wanain? Na anna laŋ, an tipna kirara anna aku ndo mbuŋa morena, na ne gidik n̄gojinna lamjinande. Na ne warac. Karais ma nena tipemb kirarira moi wandoŋaina aiŋa wetwetta

mba morenanna, wanaiñ. Ma ndona gargar ɻgoinmo ma nena wandacrenanna. <sup>4</sup> Na anna gidik, ɻgaua ma gagrar kocor, na mina manmo ik naaŋgira keracatna. Na Rarañ Aetaniacna gargar mbuña ma mandeaca wat mac nda aŋgirina. Na aia manap mīkca aia gargar kocor. Na Rarañ Aetaniacna gargar mbuñ ai toco, eteacna wat aŋgica manap eacnande. Na aia an gargamo nena ríkca wandaçnande.

<sup>5</sup> Na memetmbaca ne ndorita t̄ipemb kirarimo matau ritri wat, na ndorita iroar inkarmo matau ritri ore wat, nena ritipaikca gagrare ki, co wanaiñ? Na ne ndorita t̄ipemb kirarimo matau ritriran̄. Na moca ne mba lamñiri, Jesus Karaisa ma nena nikemb inkara maeacreke. Na ɻjarikca ma nenapmo eac ɻgocor, anna ne mana ritipaik kocor. <sup>6</sup> Na aku tongorinanna, ne matau orea wat, aia Karaisna aiñ gidik ɻgoinna morena. <sup>7</sup> Na aia Rarañ Aetaniacmo mbendeirena, manmo nen ɻgotacna moca, na ne t̄ip ɻgoreac ianna kai mo teac. Na aia gainda mba lamñiitndait, ne aimo wat, ne aimo Karaisna aiñna ramtairta kirar toca watnande, na anna moca aia an kam ndoprina. Wanaiñ. Mindacniñ ne aimo gaind ndamñirena, aia aiñna ramtair laiñga wanaiñ, na aina tonþon aniac a gaind, aia tongorinanna, ne t̄ipemb kirarir wandoik tingikca morañ. <sup>8</sup> Na ne lamñirena, aia reac ian mbuña kam gidikmo moi irikna minna, wanaiñ. Na aia kam gidik ɻgotaca anna aiñ niñgikca mona min. <sup>9</sup> Aintik ne matau

---

**13:4** Ro 6.4, na Pil 2.7-8, na 1 Pi 3.18    **13:5** 1 Ko 9.27, na 11.28,  
na Gal 4.19    **13:8** 1 Ko 13.6

witiki gagraca eac te, aia gagrar kocor, na aia tonthonj ngoin. Na memetmbaca aia Rarañ Aetaniacmo mbendeirena, te, ne Iesusa ripacrena laiplacar gagrar taruna. <sup>10</sup> Na Kacootta aukmo ndona aiña bubuocna larapacatna, na ma aukmo an aiña mona i aniacapa gargar neangatna. Na mandeaca aku tawan ndeacreke, aku an timbiñ rapara tirca neangatna, na kaina min aku nen ndambuñ nakip te, aku nena tipemb ngorik wandonaina aiña kamma gargara mba moiitndai. Na Kacootta ma aukmo an aiñ neanjrina, na aku nena ritipaikca moi gagrana, na anna nemmo mba moi ngocraiitndai.

*Polna gan timbiñ raparna mamamaina kamb*

<sup>11</sup> Na ne Iesusa ripacrena laiplacar, mandeaca aukna kambca mamairi, naaku gaindopnande, ne tonjongan koind teacrañ. Na ne aiñ gargara moca Iesusa ripacrena laiplacar koind ndaruna. Na ne aukna kambca matau warac. Ne iro kabe ningik anjica, niknik iro wetwet ndeac. Na Rarañ Aetaniac, ma nemmo niknik iro wetwetapa matatji neanrenan, na ma nemmo eacnande.

<sup>12</sup> Na aina Rarañ Aetaniaca rangairena meacramootna tipna kirar, nena muruncaminna kabe, kabea ndorita laiplacarmo pipopotaca mo. Na Rarañ Aetaniacna meikramtaira mina nemmo ra lañ neanrena.

<sup>13-14</sup> Na Kacoott Iesus Karais ma nena kadmairena, na Rarañ Aetaniac ma nemmo

---

**13:10** 1 Ko 4.21, na 2 Ko 2.3, na 10.2, na 10.8, na 12.20-21, na Ta 1.14    **13:11** Ro 15.33    **13:12** Ro 16.16, na 1 Te 5.26, na 1 Pi 5.14

2 Korin 13:13-14

lvi

2 Korin 13:13-14

matñirena, na Njerøj Rat, ma nena iroar inkara  
mikca eacrajnande.

**Raran Aetaniacna Kam Wemban Lan  
New Testament in Mborena Kam language  
Nupela Testamen long tokples Mborena Kam long  
Niugini**

copyright © 2016 Pioneer Bible Translators

Language: Borei

Translation by: Pioneer Bible Translators

© Pioneer Bible Translators Association of Papua New Guinea, Inc.; ©  
Pioneer Bible Translators of Dallas, Texas, USA

This translation is made available to you under the terms of the Creative  
Commons Attribution-No Derivatives license 4.0.

You may share and redistribute this Bible translation or extracts from it  
in any format, provided that:

You include the above copyright and source information.

You do not make any derivative works that change any of the actual  
words or punctuation of the Scriptures.

Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source  
files dated 29 Jan 2022  
8e1073ed-d2dc-5f3a-bb48-5406185123a7